



Allaganngorlugu nalunaarusiaq

2007

Allaganngorlugu nalunaarusiaq

Sinniisoqarfik ukioq manna Katuami Nuummi ukiumoortumik ataatsimiissaaq. Siulersuisut nutaat atuutilernerannit sinniisoqarfiup ileqquusumik ataatsimiinnerisa aappaat. Ilisimaneqartutut sinniisoqarfik IMAK'ip qullersatut oqartussaasoraa. Kattuffiup aalajangigassai pingaarnert tassani aalajangerneqartarput, piffissamilu takkuttussami suliassat siunniunneqartarput. Nalunaarusiaq manna 2006-imut nalunaarusiap siorna marsimi nassiunneqartup kingorna kattuffik sunik sammisaqarsimanersoq pillugu nalunaarusiaavoq.

Allaganngorlugu nalunaarusiaq siulittaasup ataatsimoortumik nalunaarusiaata aapparaa. Immikkoortuata aappaa sinniisoqarfik ulluni 16. – 17. april 2007 ataatsimiilerpat oqalugiaatigalugu saqqummiunneqassaaq.

Sivso Dorph

Imarisaanut nalunaarsuutit:

1. Perorsaannermut tunngasut
 - ◆ Atuarfeqarfik – naliliisarnermut nalunaaruk
 - ◆ Ilinniartitsisunngorniarneq
 - ◆ Inerisaavik
 - ◆ Ilinniarfissuaq
 - ◆ Sumiginnaasarneq

2. Suliaqarfinnut tunngasut
 - ◆ Piffissaq suliffissaq pillugu isumaqatigiissut
 - ◆ xxxxxxxxxxxx
 - ◆ Suleqatigiinnermut ataatsimiititaliat
 - ◆ Feriarnerni angalanernut aningaasaateqarfiit
 - ◆ Soraarnerussutisiaqarfiit PFA aamma LP

3. Aaqquissuussinnermut tunngasut
 - ◆ Kattuffik
 - ◆ Allangortiterineq
 - ◆ Ilaasortat
 - ◆ Ilaasortanik ataatsimiisitsisarneq
 - ◆ Siulersuisut
 - ◆ Sinniisunik pikkorissartitsinerit
 - ◆ Nunaqarfiit atuarfiini aqutsisut kiisalu inatsisilerineri pikkorissarneq
 - ◆ Tunngaviusumik suliaassatullu pilersaarutit
 - ◆ Aningaasaqarneq
 - ◆ Allattoqarfik
 - ◆ Danmarks Lærereforening
 - ◆ Nordiske Lærereforeningers Samråd
 - ◆ Sullivimmi atukkat / Arbejds miljø Rådet
 - ◆ Piginnaangorsaanermi Siunnersuisoqatigiit
 - ◆ ICC
 - ◆ PIP suliaqarfitsigullu kattuffiit allat
 - ◆ KANUKOKA
 - ◆ KIIP
 - ◆ FTF

4. Allat
 - ◆ Ilinniartitsisoq
 - ◆ Qarasaasiakkut nittartagaq
 - ◆ Taarsigassarsitsisarfiit Tjenestemændenes Låneforening aamma Danmarks Lærereforenings Låneforening

5. Nalunaarsuut

PERORSAANERMUT TUNNGASUT

Atuarfearfik - naliliisarnermut nalunaarut

Kalaallit Nunatsinni suli ilinniartitsisunik amigaateqarpugut. Ukiumi atuarfiusumi 2006/07 ilinniartitsisut 400 –t sinnerlugit amigaatigineqarput. Tamanna kinguaariinnut peroriartortunut ullumikkulu atuartuusunut isumannarpoq. Pinngitsoornani atuartitsinermi pitsaassuseq kalaallit inuiaqatigiit siunissaq eqqarsaatigalugu aningaasaliiffigisariaqarpaat, suna tamarmi ataqatigiisappat.

Naalakkersuisut ilinniartitaaneq aningasaliiffigerusuppaat. Tamanna nalunaarut soorunami isumaqatigaarput, kisianni aningaasaliinerit naqqaniit aallartittariaqarput.

Pikkorissartitsinerit Inerisaaviup Ilinniarfissuullu nuna tamakkerlugu piffinnilu ataasiakkaani atavartumik ingerlattuagai naammagisimaaqaagut. Suliniutit tamakku pinngitsoorani nunatsinni atuarfeqarfiup pitsaassusaanik kivitsisussaapput. Sulili tiimilærerinut pikkorissartitsinerit aaqqissuulluakkat ujartorpagut. Suli atuarfiit arlalippassuit ilinniartitsisunik ilinniarsimasunik atuartitsisussanik peqanngillat. Piffinni taakkunani ajorsartutut inissittussat tassaapput kinnguariit peroriartortut. Taamaattumik atuartitsisut piffinni taakkunaneersut pikkorissartinneqartuartaqarput. Aningaasaliineq taamaattoq meeqqat siunissaannut qulakkeerinnittuussaaq.

Nunaqarfinni isorliunerusuni ilinniartitsisunik ilinniarsimasunik amigaateqarfiunerpaavoq, nunaqarfippaaluillu ilinniartitsisunik ilinniarsimasunik peqaratik. Amigaateqarnerli isorliunerusuni kisimi atuutinngilaq, tassami Nuummi ukioq manna atuarfiusumi ilinniartitsisunik 50-t sinnerlugit amigaateqarpoq.

Tusarparput Naalakkersuisut ilinniartitsisussaaleqinerup anigorniarnernut suleqatigiissitaliorsimasut. Ilinniartitsisut Kattuffiat IMAK-ki suleqatigiissitamut peqataatinneqannginnera eqqumiigeqaarput isoralugulu. Uagummi isumaqaratta ajornartorsiutit suunerinik ilisimasaqarnerpaalluta. Taamaattumik nalunaarutigereersimagaluarparput suleqatigiissitamut peqataarusulluta. Raatiuukkut aallakaatitsinermi KANUKOKA-miit peqataatitap toqqaannangitsumik tamanna itigartissimavaa. Tamanna paasiuminaatsipparput, atuarfimmimi ajornartorsutit aaqqinneqassappata suleqatigiinnis-saq pisariaqarlunnarmat.

Ilinniartitsisussaaleqineq atuarfiup peqqussutaata anguniagaanut arlalinnut naammassinnissinnaannginnermut tunngaviullunnarpoq. Peqqussut malillugu tuluttut atuartitsineq alloriarfiit aappaanni aallartinneqartussaavoq, ilinniartitsisussaaleqinerli tunngavigalugu inatsisitigut piumasaqaataasoq tamanna arlalinni naammassineqarsinnaanngilaq, soorlu aamma qallunaatut atuartitsinermi piumasaqaataasut tamakkiisumik arlalinni naammassineqarsinnaanngitsut. Ajornartorsiut aamma allamiut oqaasiisa pingajuannik neqeroorniarnermi taamaappoq. Ajornartorsiut annertungaarmat, suleqatigiilluta aaqqiinaqatigiinnissamut aqqtissiuussisariaqarpugut.

Ajuusaarnartumik aamma atuarfiit ilaanni suleqatigiissinnaaneq ajornartorsiutaavoq annertoq, tamannalu sullivimmi atugarisanut nuanniitsumik sunniuteqartarpoq. Atuarfinnut taakkununga ilisarnaataasarpup napparsimakulaneq ilinniartitsisullu atuarfinit taamaattuniit aallakulanerat. Taamatut ajornartorsiorfiusuni aqqtissaq ataasiinnaavoq, tassalu suleqatigiinnermi ataatsimiititaliat pitsaasumik aallartissallugit. Ajornartorsiutinut aallaaviukkajuttarpoq ersarissunik najoqqutassaanganinneq. Tamatumalu nassatarikkajuttarpaa suleqatit ilaasa eqqunngitsumik pineqartutut misigisimalersarnerat imaluunniit ilumoorunneqartutut misigisimannginnerat. Ajornartorsiummik aaqqiiniarluni iliuuseqartoqarsimanngikkaangat ajornartorsiutit annertusimaluttuinnartutut pilersarput, taamaalillunilu atuarfiup tamarmiusup ingerlatsineranut nuanniitsunik kinguneqartarlutik.

Taamaattumik matumuuna atuarfinnut uteqqillugu piumasaaqatigeqqissuarput suleqatigiinnermi ataatsimiititaliat sulinerat tunngivissilluaqqullugu, tassami taamaallaat suleqatigiinnissamut piumasuseqarnikkut, tusarnaarsinnaanikkut, paasinnissinnaanikkut paaseqatigiillunilu iliuseqarsinnaanikkut ajornartorsiutaalersimasut aaqqinneqarsinnaammata.

Taamaattumik isumaqatigiinniarnitsinni isumaqatigiissutigisimavarput, KANUKOKA suleqatigalugu suleqatigiinnik pilersitsissalluta, suleqatigiinnermut ataatsimiititaliat isumaqatigiissutit malilugit ingerlallualernissaannut aqcutissiuussisussanik. Suliassaq tamanna upernaap ingerlanerani aalartinneqassaaq.

Ajornartorsiut alla annertusigaluttuinnartoq tassaavoq, atuartut naalasseriitsut amerliartuinnarnerat. Isumarput malillugu tamanna atuartut angerlarsimaffimmini atugaannik amerlanertigut aallaaveqartarpoq. Atuartut amerlasuut tassunga killittarnerannut tunngaviulluinnartuupput amerlavallaat sumiginnarneqartarnerannit imaluunniit arlaatigut atonerlunneqarsimanerannit. Atuartut taakku amerliartornerat ilutigalugu aammaa atuartut annertusisamik immikkut atuartinneqarnissamik pisariaqartitsisut amerliartorput. Isumarput malillugu ilaqtariit ulorianartorsiortutut takuneqarsinnaasunut piaartumik iliuseqartarnissat ingerlanneqartariaqarput, ikiuinikkut, siunnersuinikkut kaammattuinnikkullu. Taamaattumik komuninit nunalu tamakkerlugu naalackersuinikkut ingerlatsisunit ullumikkumit annertunerujussuarmik iliuseqartoqartariaqalerpoq.

Naliliisarnermut nalunaarussiaq

Siulersuisut siunnersuummut arlalinnik uparuaateqarnikuupput, ataanilu siulersuisut naliliisarnissamut nalunaarutissatut siunnersuummut akissumminni uparuaatigisimasaasa annertunersaat issuarneqassapput :

“Aallarniilluni oqaaseqaatit:

Siulersuisut tusarniaanerup sivisussusilerneqarsimamera akuersaaruminaatsippaat. IMAKip nalunaarutissap kalaallisussa 28.12.06 tiguaa, kingusinnerusukkullu pissarsiarinissaa noqqaassutigeqqereerlugu qallunaatuua pillutigu. Kalaallisuuani allakkani ilanngunneqarsimasuni allakkatigut takuneqarsinnaavoq, qallunaatuua 28.11.06 nassiunneqarsimasoq, kisiannili taamaattoqarnikuunani.

IMAKip naalackersuisunut sakkortuumik inassutigissavaa, kalaallisuaa qallunaatuaalu ataatsikkut nassiunneqartassasut, aammattaaq inassutigissallugu tusarniaanermi piffissaq sivisuneq atugasiiisutigineqartassasoq, ilaasortat ilaatinnessaat periarfissinniassagatsigu, taakkunungami aaliangersakkat ulluinnarni sulinerannut annertuumik sunniuteqartussaammata.

Oqaaseqaatit tamanut tunngasut

Allakkani ilanngunneqarsimasuni takuneqarsinnaavoq siunnersuut ima ilusilersorneqarsimasoq, tamanut tunngasuniit aallararteriarluni immikkut sammisanut ineriartuuarinneqarluni, uteqattaarinerit pinaveersimatinniarlugit.

Tamanna aallaavigigaanni ajunngilluinnartumik siunertaqartoqarpassippoq, kisiannili nalunaarusiap inernera takugaanni aaqquisuuneqarnera puullaaqinarpoq atuisunullu inussiarniilluni.

Aammattaaq takuneqarsinnaavoq uteqattaarinerit pinngitsoorneqarsinnaasimannigitsut. Taamaattumik siulersuisut kaammattuutigaat nalilersorneqaaqqissasoq – naak uteqattaarisoqassagaluartoq – aaliangersakkat ersarinnerulissannginnersut, atuartitsivinnut ataasiakkaanut tunngasut taakku ataanut inissinneqartuuppata.

Siulersuisut naliliinerat malillugu tamanna atuisunut atoruminarsaanerussagalarpoq matumani ilinniartitsisut, angajoqqaat atuartullu eqqarsaatigalugit.

Siulersuisut siunnersuutip suliarinerani suliap ingerlannera ajornakusoortissimavaat, pineqarsimasuni §§-it uteqattaarfigineqartuartaqarmata aaliangersakkat ataasiakkaat isumaat ataqasigiilerniarlugu.

Ulluinnarni atuartitsineq inaarutaasumillu misilitsinneq

Siulersuisut tulluutuutinnigilaat, ulluinnarni atuartitsinnermiit inaarutaasumik misilitsinnermut ersarissumik avissaartitsisoqarsimanniginnera.

Illuatungaartigut oqaatigineqarsimavoq aaliangersimasumik qulequtsiilluni suliaasaq ulluinnarni atuartitsinerup ilagigaa, kisiannili aamma inaarutaasumik misilitsinnermi takkutinnitsoornermut aaliangersakkanut ilaatinneqarluni, soorlu aamma ilinniartitsisunik naliliisartoqarnissaa ilanngunneqarsinnaasutut oqaatigineqarsimalluni. Aammattaaq §§ 7 – 10-mut qulequtaasa takutippaat 10. klassemi misilitsinnerit kiisalu kapitel 9 10. klassemi misilitsinnerit allat takutilluguttaaq, aaliangersimasumik qulequtsiilluni suliaasaq misilitsinnertut isigineqartoq.

Siulersuisut paasinninnerat malillugu, aaliangersimasumik qulequtsiilluni suliaasaq suleriaasiuvoq, kisiannili aaliangersakkat malillugit misilitsinnertut isigineqarluni.

Aaliangersimasumik qulequtsiilluni suliaasaq aaliangersakkani inaarutaasumik misilitsinnertut isigineqaannassappat, ersarissumik oqaatigineqartariaqarpoq misilitsinnerusoq ulluinnarni atuartitsinerunani, taamaattoqarpammi aaliangersagaq ingerlaavartumik naliliisarnermi nalunaarummiittussatut oqaatigineqartariaqarmat.

Atuartut suleriaatsimik misiliisinnissaat anguniarneqarsimappat, aaliangersagaq tamanna ilikkagasatut anguniagassanut ilanngunneqartariaqarpoq, massakkutuunngitsoq ilitersuutini ilikkagassanut pilersaarusiameiginnarani.

Tassunga tunngatillugu ataartigut naqissuserusupparput, siulersuisut isumaqarmata, aaliangersimasumik qulequtsiilluni suliaq suleriaatsitut pingaartorujussuartut isumaqarfigineqarmat, annerni atuartitsinnermi nalinginnaasumik atuarnepup ilagisariaqagaa, akullerni aaliangersimasumik sammi-saqarluni suliaqartarsimanernut nangitsissutaasoq.

Atuartitsissutit misilitsiffissat annertusinerat

Siulersuisut siullermik malugeqqussuaat, atuartitsissutit misilitsiffissat amerlinerisa pisariaqalersikkaat Inerisaavimmi atuartitsissutinut siunnersortit amerlanerusut atorfinitsinneqarnissaannik kinguneqartussaana. Tamanna ilaatigut tunngaviulluinnartuuvoq, ilinniartitsisut misilitsiffissani nutaani misilitsinnissami misilitsissutissanik sanaartorneq misilittagaqarfigineqanngimmat. Taamaattumik pisariaqaartuuvoq ilinniartitsisunut siunnersuisoqarsinnaanissaa qulakkiissallugu atuartut inatsisitigut eqqortumik pineqarnissaat qulakkeerniarlugu.

Siunnersortit tamakku piaartumik atorfinitsinneqartariaqarput, misilitsinnerit ulluinnarni atuartitsineq tarrarsuuserutut inessittussaammassuk.

9. klasseni inaarutaasumik misilitsinnerit atuutinneqalernissaat (færdighedsprøver).

9. klasseni inaarutaasumik misilitsinnerit atuutinneqaleralata kingunerissavaa ilinniagassatut anguniakkat pilersaarutillu allanngortineqarnissaat. Ullumikkut tamakku alloriarnikkaarlugit aaliangersagaapput, taamaammallu qulakkeerneqarsinnaangilaq 9. klasset atuarfimmii anigunik ilinniar-

simasassatik tamakkiisumik angusimanissaat. Taamaammat atuartut tamarmik naligiisumik inis-sisimangillat.

Misilitsinnermi oqaatsit nutserinerlu.

Aaliangersakkat ullumikkutut itsillugit qulakkeerneqanngilaq atuartut nammineq oqaatsitik atorlugit misilitsinnissaat. Aaliangersakkat taakkua ilanngullugit eqqarsaatigineqartariaqarput, taamaangippat misilitsinnerit atuarfiusuni misilitsiffiusuni fysik/kemi matematikkilu oqaatsinik misilitsifinngussaaq misiltsissutissaq saneqquitiinnarlugu.

Allattariarsornermi misilitsinnerit ulluinnarni annerusumik ”oqaluttariarsorluni” atuartitsis-sutaasuni.

Atuartitsissutini upperisarsornermi, inuiaqatigiilerinermi, pinngortitalerinermi il. il. misiltsissutis-satut allattariarsorluni misilitsinnerup eqqunneqarnerani misiltsissutissat annertuumik piumasa-qarfiupput atuartitsissummi misiltsissutitut isigineqarnani allattariarsorluni misiltsinnerinnartut isigineqalissangippat. Minnerpaamik qulakkeerneqartariaqarpoq atuartunut suliuassiissuti-gineqartut inunnguuseralugu oqaatsit atorlugit allassimanissaat taamatullu akissutaanni inun-guusuuseralugu oqaatsit atorneqarsinnaasariaqarlutik.

Tamatuma kingunerissuaataaq annertuumik nutserisussanik pisariaqartitsinissaq, ilinniartitsisorisaq / naliliisussaq atuartorlu oqaaseqatigiijunggippata.

Pisortat akisussaanagerat kommunillu nammineersinnaanagerat

§ 20-mi erserpoq, atuarfiup pisortaa , misiltsinnernut kiisalu aaliangersimasumik sammisaqarluni suliaqarnermut malittarisassat malillugit ingerlanneqarnissaannut akisussaasuusoq. Tamanna sooru-naliuvoq, soorluttaq pissutinut tamanut atuarfimmi ingerlanneqartunut pisortaq akisussaasuusoq.

Taamaakkaluartorli pisortaq suliassanik agguaassisinnaatitaavoq, kimullu akisussaassusiiliisin-naanerani sumiiffinni ingerlatsinermut malitassat aaliangersarneqarsimasut malillugit ingerlanneqartussaalluni, atorfimmullu suliassat akuerineqarsimasut malillugit. Nunatsinni atuarfik kommunenit ingerlanneqarpoq, taamaattumillu suliassiisarnermut/nammagassiinermullu kommunit Namminersornerullutillu Oqartussat akornanni isumaqatigiissutaasimasunut unioqquitsinerusaaq, nalunaarusiami malitassanik aaliangersuisoqarpat, kommunit nammineersinnaatitaanerannut akuliuttumik, soorlu aaliangersuinikkut suliassat sorliit inunnit kikkunnit sularineqartussaanerinit aaliangersoreerlugit.

Aaliangersakkat taakkununga tunngassuteqartut tamarmik naleqqussarneqartariaqarput, pisor-tammi akisussaanagerannik arsaarneqarnavianggimmata.

Aaliangersakkat sulinermi piffisamik isumaqatigiissummut sunniutissaat

Siulersuisut tupigusuutigalugu maluginiarpaat, aalingersakkani sulinermi piffissamut isuma-qatigiissummi isumaqatigiisutit atuuttuusut eqqortillugit qularnaarneqarsimangimmata. Taamatut pisoqarnera ajuusaarnartuuvoq, sulisitsusummi qanittukkut isumaqatigiinniarnit naammaseqqammersut atorlugit tulluarsaanissaminnut periarfissaqarsimagaluarmata, sulinermi piffissamik atuisarnitsinnut isumaqatigiisummik pisariaqartutigit allannguisarnikkut. Nalunaarusiap qallunaatuua 28.11.06 saqummersinnaasimappat, suliaq ima ingerlareersimatigissaagaluarpoq, isumaqatigiinniarnit nalaanni sulisitsisut siunnersuutip akuliunneqarnissaa periarfissaqarfisima-galuarlugu.

Taamaaliorsimanginnerup massakut nasatarisussanngorpaa nalunaarusiaq sulinermi piffissamik atuisarnermut isumaqatigiissut malillugu naleqqussarneqartariaqalerat.

Tamatumalu nassatarisussanngorpaa siunnersuummi piffissaliussatut killiliunneqartarsimasut massakut allanngortittariaqarnissaat. Aammattaaq takusinnaavarput, oqaluttariarsorluni misilitsinnissat tamarmik ullumikkut oqaluttariarsorluni annertusisamut misilitsinnermut nalilernerqartariaqarnerat. Taamatut naliliineq uppernarsarneqarpoq ”qanga” misilitsissutaasartut allaaserineqarsimanerannit.

Malittarisassiornermi pisinnaatitsissutit:

Naalakkersuisut inaarutaasumik nalunaarusiamut saqqummiisinnaanermut piginnaatitsissutitiliinerat innersuutigalugu amigaatigineqartoq tasaavoq atuarfik pillugu Inatsisartut peqqussutaata kingulermik allanngortinneqarneranut innersuussinissaq.

Aaliangersakkanut ataasiakkaanut oqaaseqaatit:

§ 2 imm. 5 (naliliisarnermi uuttuutit)

Siulersuisut iluarisimaarpaat 13 atorlugu nalileeriaasaq ingerlatiinnarneqarmat, kisiannili qulakkeerneqartariaqarpoq, angajoqqaanut atuartunullu ilitersuusiornissaq, taamaalilluni takuneqarsinnaalersillugu karakteriliisarnermi uuttuutit, Danmarkimi ilinniaqqiffinni uuttuutitut atorneqartunut sunut assingusuuneri takuneqarsinnaalersillugit.

§ 3. imm 3 aamma 4 (atuartup imminut nalilerner)

Ajunngilaq atuartoq imminut nalilerluni allaaserisasammat, aammattaaq pissusissamisoorpoq imminut nalilerneranni angajoqqaat akuutinneqartasammata atsiorlutillu. Kisiannili angajoqqaat (angjoqqaajussutsimik oqartusaasut) atsiorusussanngippata, aturtup pisinnaatitaaffii arlaatigut qulakkeerneqartariaqarput, misilitsissimanermut uppernarsaammik pisinnaanngorlugit.

§ 3-mi taaguut misilitsissimanermut uppernarsaat atorneqarpoq, § 92-mili qallunaatuuani atuarunnaarnermut uppernarsaat atorneqarluni, taaguutit taakku ataqatigiittariaqarput.

§ 9 imm. 4 (Atuartup atuartsissunini misilitsiffissamini qinersinera)

Oqaaseqatigiit ersarlupput. Imatut paasineqartariaqarpa, atuartoq atuartsissutit arlaannik sumilluunniit qinersinnaasasoq, qullersaqarfiup aaliangersimangisaanik imaluunniit ima paasisariaqarpa, sumiiffimmi toqqagassat kisimik toqqarneqarsinnaasasut imaluunniit inuttut ineriartorneq angajullerni atuartsissutissat takusigit.

Atuartoq arlaannik qulaani taaneqarsimasut akornanni nammineq toqqaasinnaassappat tamanna atuarfinni misilitsitsivissani tamani annerusumik allaffissortariaqalernermik kinguneqartussaavoq, tamannalu isumaqatigiinniarnerni qaangiuteqqammersuni naatsorsuutigineqarsimanngilaq. Taakku saniatigut atuartunut angajoqqaanullu sivisunerusumik siunnersuinissamik pisariaqartitsissaaq.

Siunnersuummili sumiiffimmi toqqagassat imaluunniit inuttut ineriartorneq pineqartoq, tamanna toqqaannartumik allassimasariaqarpoq.

§ 10 aamma § 13

Piffissaliunneqarsimasoq ukiup atuarfiusup aallartinnginnerani juunip aallaqqaataanut killilernerqartariaqarpoq, ilinniartitsisut sulineranni sulinermut piffissamut isumaqatigiissutaat aallaavigineqartariaqarmat – tamanna tamanut tunngasumi oqaaseqaatini takuneqarsinnaavoq.

§ 11 imm. 2

Immikkut atuartitsinerup naasuaataa amigaatigineqarpoq, peqqussusioerunerup kingorna suli taana nutaamik nalunaarusiuunneqarnikuunngimmat.

§ 14 (Immikkut suliamut naliliisartut)

Misilitsinnissamut nalunaarfissatut killiliunneqarsimasut eqqarsaatigigaanni, pisortaqarfiullu immikkut sulianut naliliisartunik toqqaanissaanut piffissaliussai qiviraanni taakku piviusorsiorpalaanngillat.

§ 15 imm. 2

Misilitsiffiusut tamarmik nakorsamut nakorsiarnissamut periarfissaqartitsinngillat, taamaattumillu aaliangersagaq peqqinnissaqarfimmuut sangutinneqartariaqarpoq, taakkuninnga uppersarneqarsinnaasunngortillugu, atuartoq napparsimanini peqquutigalugu misilitsinnerni peqataasinnaanngitsoq.

§ 16

Napparsimanermik nalunaarsimanissaq allanngortinneqartariaqarpoq napparsimanermut, tassami napparsimasutut nalunaarsimagaanni aamma takkutinngitsoornissaq naatsorsuutigineqartariaqarmat.

§ 17 imm. 3 (Napparsimasimaganni nutaamik misilitsinnissamut periarfissaqarnissaq)

Periarfissaannartut allassimasariaqarpoq, tassunga taasiullugu atuartup ukiumoortumik nalilerneqarsimaneri misilitsissimanermut uppersaammut nuunneqarsinnaasariaqarput, atuartoq nammineq kissaatini malillugu ukiup tullissaanut misilitsinnissamut nalunaarsimanngippat. Natsorsuutigineqartariaqarpoq atuartoq ilinniakamik allamik ingerltaqarluni aallartissimassasoq ukiup tullitup misilitsinnerup nalaani, taamaalilluni misilitsiffissami periarfissiisutigineqartumi misilitsinnissaminut periarfissaqanngitsorluni.

§ 22 (Ikiuutitik atuisinnaanerak)

Iluoortuusinnaanngilaq kommunit pingaarnersiunerat malillugu atuartoq ikiuutaasinnaasunik qinerlernissaminut killiliiffigineqassasoq. Tamatumuuna atuartut asigiinngisinneqalissapput. Misilitsinnerit ulluinnarni atuartitsinerum tarrarsuisinnaasariaqarput, taamaattumillu ikiuutaasinnaasunik atuinissamut minnerpaamik ulluinnarni atuarnemi atorneqartartunik aallaaveqartariaqarput.

§ 31

Pisariaqarsorinannngitsutut isiginarpoq tuluttu misilitsikkasuarnermi naliliisartoqarnissaa, atuartitsissutinili allani misilitsikkasuarfissani taamaannani. Qullersaqarfik isumaqarpat tuluttut misilitsinnerit tamarmik naliliisartumit nalilerneqartassasut, taava taamatut aaliangersaaneq aaliangersakkat immikkoortuanni 1-mi qullersaqarfimmit aaliangiinneqarsinnaavoq.

§ 36 imm. 2

Eqqarsaatigeqqissaarpasinngilaq oqaatigineqarmat atuartup nammineq allattukkaminik ataatsimooqatigiilluni inigisamiit kisimiilluni misilitsinnissamut inigisamut nassataqarsinnaannginnera. Atuartup nammineq allattukkani kisimi iluaqutigisinnaavai allat allattugai pinnagit, allattuisimanernik katersinerit agguaassinerillu piffissamik atuiffiusarput paarlaasinnaanernillu kinguneqartarlutik.

§ 49

Ilinniartitsisut marlunniit amerlanerusinnaasarpuk klassemik atuartitsisimasut, tamatumani holdikkaarinnillu peqqussummi aaliangersakkat takoqquneqarpuk. Qulakkeerneqassaaq, ilinniartitsisoq atuartumik atuartitsissummi atuartitsisimasoq, atuartumik misilitsinnerup ingerlanneqarneranik aqutsisuunissaa.

§ 53 imm. 2

Allattariarsorluni eqqoqqissaartumik misiliinermi aamma oqaasilerineq killiffilersuinerlu ilaappuk, taamaattumik taasat kingulliit marluk peerneqartariaqassappuk imaluunniit taajorneqarsimasut ima imaqartigisariaqarpuk misilitsinnissami pineqartussat tamarluinnaasa allassimalersittariaqarlugit.

§ 54 imm 4.

Ikiutissat sorliit atorineqartussaanneginnersut allassimagaanni, aamma ersarissumik oqaatigineqartariaqarpoq “formelsamling” atorineqarsinnaanersoq.

§ 69 imm. 3 (Immikkut sammisaqarluni allaaserinninnermi piffissaliussaq)

Atuartup suleriutsimut misilinneqarnissaa siunertarineqarpuk, takukkit tamanut tunngasunut oqaaseqaatit, oqaatigineqassaaq ulloq atuarfiusoq akunnernik qassinik sivisussuseqarnersoq, taamaattoqasanngippat atuartunut atugasarititaasut assigiinngiaartorujussuussammata, taamaatillutillu naligiimmik pineqaratik.

§ 60 (immikkut sammisaqarluni suliassaq)

Piffissaliunneqarsimasoq sapaatip akunneri marluk sivikippallaaqaaq. Siumut oqaatigineqarsinnaanngilaq, ilinniartitsisoq ataaseq nalilersugassanik arlalissuarnik suliassinneqassanersoq, allalu ikinneralaannguanik – tamatumanimi aaliangiisuusussammata atuartut suliassaminik qinersisi-maanerat – aammattaaq arlalitsigut imaattussaalluni nalilersugassani ilinniartitsisut arlallit suliamut ataatsimut nalilersuissasut, soorlu aamma imaattoqarsinnaassasoq sularineqarsimasoq ilinniartitsisup tamakkiisumik oqaaserinngisaanit sularineqarsimasinnaasoq. Taamaattumik nutserisumik ilanngutsitsinissaq pisariaqalersinnaavoq.

§ 63 imm. 2, § 66 imm. 2, § 69 imm. 2, § 70 imm. 2, § 81 imm. 2, § 84 imm. 2

Qulakkeerneqarsinnaanngisaannarpoq atuagassaq atuartumik ilisimaneqanngitsuusoq, taamaattumik allassimasariaqarpoq atuartitsinnermi atorineqarsimanninnissaa.

§ 63 imm. 3, § 66 imm. 3, § 69 imm. 3

Misilitsinnissamat piffissaliunneqarsimasoq sivisuallaarpoq, siunnersuutigineqassaaq piareersarnissamat 20 – 40 minutsiussasut kiisalu 20 – 30 minutsit ataasiakkaarluni sularisimasat saqummiunnissaannut, kiisalu 40 – 60 minutsit misilitseqatigiikkaanni 20 – 40 minutsit misilitseqatigiilluni saqummiinissamat.

§ 70

Eqimattakkaarluni misilitsinnissaq periarfissinneqartariaqarpoq tamatumalu kinguneranit aaliangersakkat § 71 imm. 3 aqqiissuteqarfialugit

§ 77

Radioakivititillit piviusumik misileraaffigineqarsinnaanngillat, meeqqallu atuarfianni ulloriarriornermi misileraataasinnaasoq ataasiinnaavoq, taamaattumik siunnersuutigineqarpoq, qulequttat taaku peerneqassasut taarserneqarlutillu avatangiisit ikuaallaasernerlu kiisalu qaamaneq maligaasallu, taamaalilluni ilikkagassatut pilersaarutit malinneqalissappuk.

§ 78

Pinngortitalerinermi nunalerinermilu misilitsissutit atortussalersorluni oqaluttariarsuutigaluni ingerlanneqartariaqarput oqaluttariarsornerinnarmi misilitsissutaaginnaratik. Taamaaliorneq ilinniartitsinermi pilersaarutit kiisalu pinngortitalerinermi siunnersuutit naapertuulluarnerusumik siunertamut ingerlanneqarniassammata.

§ 79 aamma § 81

§79-mi paasinarpoq misilitsissut atortussalersorluni oqaluttariarsorfiusiq kisiannili § 81-mi misilitsissut oqaluttariarsornerinnaasoq.

§ 79-mi paasinarpoq misilitsissut eqimattakkaarluni misilitsissutaasinnaasoq, kisiannili § 81-mi aaliangersakkani erseqqarippoq misilitsitsissuk atuartup ataatsip kisimiilluni misilitsitsissutigisinnaagaa. Inuiaqatigiilerinermi annerusumik oqaloqatigiinnerulluni atuartitsiviusartumi eqimattakkaarluni misilitsitsiffiusariaqarpoq.

§ 81 stk. 3

Inuiaqatigiilerinermi atuartumik misilitsitsinermi inimi misilitsitsiffiusumi internetimut attavilikkamik computereqartariaqarpoq. Atuartup misilitsineqarnermini paasissutissanik tunngavissalersorneq atineq ilanngullugu misilitsinneqaatigisussaagamiuk.

§ 82

§ 81-mi erseqqarippoq misilitsissutissa eqimattakkaarluni misilitsiffiusinnaasoq, kisiannili § 84-mi takuneqarsinnaalluni misilitsissuk inummut ataasiakkaamut taamaallaat naatsorsuutaasoq. Upperisarsiornermi eqqarsaqqissaarnermilu oqaloqatigiinneq aallaavigalugu atuartitsinerup ingerlanneqartarfiini, eqimattatut misilinneqarsinnaaneq perirfissaasariaqarpoq.

Upperisarsiornermi eqqarsaqqissaarnermilu qarasaasiaq internetimut ammasoq inimiitinneqartariaqarpoq, atuartoq ujarlerfiit atorlugit atugassanik aallarsinnaanerani misilinneqaatissanut ilaammat.

§ 85 (Sumiiffinni qinigassani misilitsinnerit)

Taamanikkut kommunit atuatsivissani pilersaarutissanik sananissamut pisussaagallarneranit misilittakatta takutippaat, taamatut pilersaarutit kommunini sananeqarneq ajortut. IMAKittaaq ilisimavaa sumiiffinni toqqagassanut ilikkagassanut pilersaarutit kommunerpasuarni sulisuliarineqarsimanngimmata, taamaattumik misilitsinnissamut kommunit aaliangersaasarnissaanik aaliingersaaneq piviusorsiuunngilluinnartutut isigaarput.

Sumiiffinni qinigassanut misilitsinnissamut aaliangersakkat atatiinneqarnissaat eqqarsaatigineqarpat, qitiusuminggaanniit malitassanik aaliangersaasoqartariaqarpoq atuartitsiviit soorliit minnerpaaffissaat ilanngullugit ilikkagassatut anguniakkat aallaavigalugit sorliit misilitsiffiusinnaasannersut. Taammaattoqassanngippat atuartut annertoorujussuarmik assigiinngisinneqalissammata.

§ 92 imm. 2 nr. 6

Piginnaasanik minilitsinnermi angusaasimasut atuarunnaarluni allagartartaarnermi allassimassannginnamik, taakkumi kapitel 7-imiipput.”

Qulaani allassimasut tassaapput KIIP-imut akissuteqaatitta isseri, naliliisarnissamut nalunaarusiatut sisunnersuummut.

Ilinniarfissuaq / Ilinniartitsisunngorniarneq

Ukiut kingulliit arlallit Ilinniarfissuaq 3. s-inut pikkorissaanermik ingerlatsigaangat peqataasarpugut, peqataaffigisarlugu kattuffilerineq. Pikkorissaanerni ulluinnarni IMAKi kattuffittut suliarisartagai sammisarparvut, taamaalillutik ilinniartitsisunngorniarniat kattuffippat pillugu paasisutissii-sarluta.

Aasaru 28-nik nutaanik ilinniartitsisunngortoqassaaq. Ullumikkut Ilinniarfissuaq 163-inik ilinniartitsisunngornianik ilinniartoqarpoq. Ajuusaarnartumik amerlasutsit taakku meeqqat atuarfianni ilinniartitsisussaaleqinerup qaangerniarnissaanut suli naammangillat. Taamaattumik ilinniartitsisunngorniarsinnaanermut periarfissallit sumiiffinni assigiinngitsuniittut periarfissiuunneqarnissaat aqutissiuunneqartariaqarpoq, soorlu ilinniartitsisunngorniarnissamat piumasaqaataasunik naammassinnaanngitsunut pikkorissaanertigut aqutissiuussinikkut.

Ilinniartitsisunngorniarniat 163-inerata nassatarisussaagaluarpaa ukiuni tulliuuttuni 40-t missaanni uki-umut ilinniartitsisunngortoqartassasoq, kisiannili misilittakkat takutittarpaat, ilinniarnepup ingerlanerani taamaatitsiinnartoqartartoq. Tamaattumik naatsorsuutigisariaqassuarput ukiuni tulliuuttuni ukiumut 30-t missaanni amerlassusilinnik ilinniartitsisunngortoqartarnissaa, Ilinniarfissuarmiit naammassisunik. Kisitsisit taakku aallaavigineqassappata meeqqat atuarfianni ilinniartitsisunik pisariaqartitatsinnik matussusiinissamat naammangillat.

Inerisaavik

Inerisaaviup siulersuisui manna atorunnaarsinneqarnikuupput, taamaalilluta Inerisaaviup ingerlanneqarneranut toqqaannartumik sunniuteqarsinnaajunnaarnikuuvugut, soorlu siulersuisut atuukkalarmata taamaassimagaluartoq. Inerisaaviup siulersuisui atorunnaarsinneqarnerannut atatillugu isumaqatigiinnikuugaluarpuq suleqatigiiffiliorluta IMAKip KANUKOKAllu aallartitaassa peqataaffigisaannik, atuisut sinniisaattut ingerlanneqartussamik. Ataatsimiittartoqatiginni taakkunani ataatsimiinnialunnguit ingerlannikuuvavut ukiup ingerlanerani. Ullumikkut amigaatigisarput tassavoq inatsisitigut illersugaasumik suleqatigiiffimmik pilersitsinissarput, taamaalilluta suleqatigiinnerput isumannaatsumik ingerlassinnaalerniassagatsigu.

Ukiumi atuarfiusumi 2006/2007-mi Inerisaavik pikkorissaanernik assigiinngitsorpassuarnik ingerlataqarsimavoq, qitiusumi sumiiffinnilu ingerlanneqartunik, taakkunani ilinniartitsisut 1600-t missaat pikkorissarneqartussaapput. Taakku saniatigut AD-mik PD-milluunniit ingerlatsisut ullumikkut 36-upput miisalu masterimik ingerlatsisut 20-ullutik.

Sumiginnaaneq

Sumiginnaaneq annertoorujussuuvuq, sinniisoqarfiullu ingerlanneqartarnerini ukiuni kingullerni oqallinnerni annertuumik imaqartinneqartarsimalluni.

IMAKi ukiut kingulliit marluk pingasulluunniit ingerlanerini sumiginnaasarneq pillugu suleqatigiisitaliani marlunni peqataasarnikuuvuq, taakkulu aqutigalugit Inatsisartunut naalackersuisunullu iliuusissatut innersuussutinik inassuteqaasioqataasarnikuulluni, inassuteqaatinilu anguniarneqartarpoq qanoq iliuuseqarnikkut sumiginnaasarneq annikillisarneqarsinnaanersoq. Suleqatigiisitaliaq kingulleq aamma assigiinnitsunik inassuteqaateqarpoq ilaatigu makkuninga imaqartumik:

1. Meeqqat, inuusuttuaqqat ilaqutariillu pillugit immikkoortoqarfiit akimorlugit ataavartumik ataqatigiissaarisuqatigiillorneq
2. Sumiginnaanerit suuneri annertussusiilu pillugit nalunaarsuineq

3. Kinguaassiuutitigut innarliinerit aamma timikkut/tarnikkut angutaaserfiginnineq qunusiarinninnerlu akiornissaat pillugit ilitsersuusiorneq
4. Kinaassuseq oqaatiginagu ilaqutariittut siunnersorneqarneq
5. Meeqqat inuusuttuaqqallu sumiginnagaasut pillugit pikkorissartitsisarnerit
6. Suliaqarfiit akimorlugit suleqatigiinneq
7. Aningaasaliissutissatut tunngavissanik akimmisaarutaasut tungaasigut inatsisitigut periarfissat / immikkut akuersisarmissamik periarfissat
8. Namminersornerusut aningaasalersugaannik misiligutitut meeqqanut inuusuttuaqqanullu oqqisarfissat
9. Sumiiffikkaani imigassamik aanngajaarniutinillu atornerluinermut katsorsaasarfiit

Sumiginnaanerup annertussusianik suunerinillu misissuinerit ilaat naammassinikuupput, tassa sior-na nunatsinni meeqqanik kinguaassiuutitigut atornerluisarnerup annertussusaanik misissuisimaneq saqqummiunneqarmat. Ajuusaarnartumik misissuisimanagerup takutippaa, atuartuutitta ilarpassui kinguaassiuutitigut atornerlunneqarsimasut, tassa 20 %-it missaat atornerlunneqarsimammata.

Siulersuisut isumaqarput, inuiaqatigiit ikiorserneqarnissamut pisariaqartitsisunut piaartumik ikior-siisariaqartut, tassa ilaqutariinnut siunnersorneqarnissamut tapersorneqarnissamullu pisariaqar-titsisunut, tamanna aqqutigalugu atuartuutivut ataasiakkaat ilaqutaallu aqqutissiuunneqarsinnaaq-qullugit, meeqqat ataasiakkaat siunissamik qaamanerusumik namminerlu inuunermik pitsaasumik aqqutissaqarsinnaalernissaat anguniarlugu.

SULIAQARFINNUT TUNNGASUT

2006-imi isumaqatigiinniarneq

Isumaqatigiinniarnivut marlunngornermi maajip 30-ani aallartippavut.

Ajuusaarnartumik ileqquulersimavoq isumaqatigiinniarnierit aatsaat aallartinneqartarlutik isumaqati-giissutit atuuffiisa qaangiutereernerisigut. Tamanna illuatungeriinnut tamanit akuersarneqarsin-naangilaq. Isumaqatigiinniarnierit ima naammssiaarsimatigisariaqaraluarput akissarsianut atukka-nullu iluarsissutissat apriilip aallaqqaataani atuutsinneqarsinnaasussaagaluarlutik, akilernerqarsima-sariaqaraluarlutillu. Tamakkuugaluarpummi aamma pingaarnertut isumaqatigiissummi allassimasut.

Uagut isumaqatigiinniartuvut tassaapput siulersuisut tamarmiusut allaffimmiit Lisbeth Frederiksen peqatigalugu.

Isumaqatigiinniarnissatsinnut piumasaqaatissavut isumaqatigiinniarnierup aallartinnginnerani sin-niisoqarfimmi ukiup siuliani aaliangersarneqarsimasartut. Ukioq kingulleq aamma taamaappoq, tassa Sinniisoqarfiup 2005-imi ataatsimiittut isumaqatigiinniarnissamut piumasaqaatai isumaqati-giinniarniermi piumasaqaataammata.

Isumaqatigiinniarnierit siulliit ingerlanneqarput maajip 30-aniit juunip isikkarnat ilanngullugu 2006. Ullut 13-it isumaqatigiinniarniullutik. Piffissami tassani piffissap annertunersaa sulineri piffissamil atuisarnermut isumaqatigiissummi aaqqissutissat amerlanerusut inissinneqarput, kisan-nili suli aaliangersakkat ilaannik isumaqatigiinnigiffiusumik. Sulineri piffissamik atuisarnermut isumaqatigiissutip saniatigut piumasaqaatit amerlanersaat aamma isumaqatigiinniutigineqarput anni-kitsullu inissitsiterneqarlutik. Isumaqatigiinniarnierit kingaatsuararsuarmik ingerlanneqarput.

Isumaqatigiinniarnierit kigaatsumik sivisuumillu ingerlareersullu Namminersornerullutik Oqartussat juunip 11-ani ukiunut pingasunut atuuttussamik akissarsiat qaffariaatissaannik % 5-mik neqeroorfigaatigut. 5 %-it taakku agguataarneqareersimapput 3,5 % akissarsianut atugassarititaasunullu atugasiissutigineqassallutik 1,5 %-ilu sumiiffinni ataasiakkaani isumaqatigiinniutissatut atugassaallutik.

Taamatut nalunaaruteqartoqarnera soorunami pakatsissutigeqaarput. Ingerlannaanrmi takusinnaagatsigu akissarsiat pisissutaasinnaanerat appariartussaassasoq. Taammaattumik Sinniisoqarfik ataatsimiisipparput killiffimmillu nassuiaallugit, tassanilu aaliangerluta isumaqatigiinniarnierit kipitik-kallarneqasasut aasaanerani atuanngiffeqareernerup kingornanut. Isumaqatiginniniartarfillu isumaqatigiissutigaarput isumaqatigiinniarnierit augustip qeqqani ingerlateqqissallutigit. Isumaqatigiinniarnissalli nanginnissaat kinguarateqattaarneqarpoq, Isumaqatiginniniartarfimmiit kattuffiit allat aamma isumaqatigiinniarnierifigineqartussaammata, ulluilu taakkunani aaliangersarneqareersimallutik. Aasaanerani sulinnigiffeqarnissarput qanillivoq, Sinniisoqarfillu juunip 24-ani 25-anilu ataatsimiit-tussaalluni.

Juunimi isumaqatigiinniarnitsinniit 5 %-mik neqeroorfigineqarnikuuvugut. Tamakku niaqqutsinnii-tillugit isumaqatigiinniarnierit nangippavut oktobarip 23-ani. Tassanilu saqqummiuteqqinneqarpoq neqeroorut suli 5 %-iusoq taakkunanga suli 1,5 % sumiiffinni ataasiakkaani isumaqatigiinni-utigineqartussaalluni. Isumaqatigiinniarnierit ulluisa aappaanni sulisitsisut ukiunut sisamanut 4 %-imik neqerooruteqarput, taakku iluaniillutik 1,5 % sumiiffinni ataasiakkaani isumaqatigiinniutissaq, tassa imatut paasillugu akissarsianut allanullu atugassarititaasunut 6,5 %. Isumaqatigiinniarnierit ingerlatiinnarpavut, sinaakkusiunneqarsimasutut neqeroorutigineqartup isumaqatigiinniarnierit ingerlaneranni qaffariartinnissaa siunertaralugu. Isumaqatigiinniarnierit nageqqinneranni suliner-mi piffissamik atuisarnitsinnut isumaqatigiissut naleqqussarlugu ingerlateqqipparput, aammattaarlu Sinniisoqarfiup isumaqatigiinniarnissatsinnut piumasaqaatai allat aamma naammassiniarsaralutigit. Isumaqatigiinniarniermi tassani isumaqatigiissuteqarsinnaanissamut qanilligaluar-pugut, kisiannili kisitseriaasianni nalorninartoqarpallaarnerat patsisigalugu isumaqatigiinniarnierit unitseqqikkal-lartariaqarlutigit. Isumaqatigiinniarnierillu uninngapput novembarip 16-iata tungaanut. Isuma-qatigiinniarnieq taanna kiisami kinguneqarpoq, tassa sapaammi novenbarip 19-iani ullaakkut nalu-naaqutaq 8.35 isumaqatigiissuteqarluta atsioqatigiikkatta. Isumaqatigiissullu taanna tunuliaqutat-sinnit tamarmiusunit akuersarneqarsimalerpoq. Ilaasotamik taasisitsiner-mi taasisunit 96,2 % isumaqatigiissummut akuersar-lutik taasipput, 2 %-it missaat itigartitsisut, 1,3 % taasinngit-soorsimallutik kiisalu 0,5 % atorsinnaanatik. Tasiner-mi ilaasortat 851 peqataapput. Ajuusaar-nartumik ukioq manna aamma taasiviit ilaat taasisitsinissamut ajornartorsiuteqarput. Isumaqar-pugut sumiiffiit ilaanni ilitsersuutitut nassiussuunneqartunut atuarluarsinnaaneq sungiunneqartariaqar-toq.

Isumaqatigiinniarnierit kingunerivaat sinaakkusiussaq 8,609 %-iummat, akissarsianullu tunniunne-qartussaq 10,662 %-iulluni. Isumaqatigiinniartuniit annertuumik oqimaatutaatigineqarsimavoq piffissamut isumaqatigiissutip atuunnerani akissarsiat pisissutaasinnaanerisa appariartinnginnissaat. Isumaqatigiinniarnierit aallartinnginneranni naalakkersuisut arlaleriarlutik oqariartuutigisaqat-taarpaat piumasaqaatinut tunuarsimaarnissaq, taamaattumik isumaqatigiinniarnierit aallartinnginne-ranni isumaqatigiissutillu ingerlaneranni Kalaallit Nunaanni Naatsorsueqqissaartarfik akit siunissami qanoq ineriartornissaanut missangersuutinik sanatipparput. Isumaqatigiinniartitaniillu anguniarneqarnikuuvoq missangersuummut qanittumik angusaqarnissarput.

Aammattaq isumaqatigiinniartitaliit oqimaalutaanikuuvoq isumaqatigiinniuttakkatta isumaqatigiis-sutini assigiinngitsuni inissisimasut akornanni assigiinngissutit qaffariartinnginnissaat. Taamaat-

tumik isumaqatigiissutini assigiinngitsuni procentinngorlugu qaffariaatit annikitsunnguamik assigiinngiiaarput. Tunngaviumumik akissarsiat 10 %-ip missaani qaffariaateqarput, ilaannut taak-kunangga qaffasinnerutaartumik ilaannullu taanna inulaarlugu.

Sulinermi piffissamik isumaqatigiisuterput naleqqusaallannikuuarput. Aaqqiissutit amerlanersaat ullumikkumut atuuttunut naleqqussaanerunikuupput, ilaallu oqaasertamikkut paasinarsarneqar-nikuullutik. Kisiannili aamma isumaqatigiissummi malunnaateqarluartunik allanngortitsisoqarpoq. Taakkulu ukuupput:

- Malunnaateqarnerpaaq tassaavoq akunnerit nakkutilliinermut unillatsiarnernullu 240 tiiminiit 214 tiiminut appartinneqarmata, tamatuma naligaa ukiumut atuartitsisussaataaneq 13 tiiminik qaffariassamat, piffissaq suliassanut atorneqassanngippat, imaluunniit ullukkaangortissagaanni, atuartitsinissaq ullormut 3 minutsinik 54 sekuntinillu qaffari-armat.
- Annernut siunnersortinut ukiumut tiimit atugassarititaasut 33 tiiminik qaffariarput. Taaguul-lu annernut siunnersorti atuarfimmi siunnersortitut taaguuseratsigu.
- Ilinniartitsisut 60-ileereersimasut, manna 180 tiimit sinnerlugit qaangiuttoorsinnaan-gormata.
- Sulinngiffeqarnerup nalaani akissarsianik ilanngaassisarnermi naatsorsueriaaseq allanngor-tinneqarmat, qaangiuttoornerit ilanngaatigineqassartillugit.
- Atuarfinnut pointilersuineq ullumikkutut iinnassaaq, tassa 2008-mi appariartinneqassanani.

Atuartitsisunut akissarsiat ingerlaarnerat sivikillineqarpoq, tassa trin 3-miittarnerat ukiunut pingasu-nut appartinneqarmat ullumikkut ukiunik sisamanik sivilissuseqartinneqartoq kiisalu trin 4-miit-tarnerat ukiunut marlunnut appartinneqarpoq ullumikkut ukiunik pingasunik sivilissuseqartoq. Aammattaaq soraarnerussusiaqalernissamat ileqqaarutaat qaffariartinneqarput kiisalu Atuartitsisut Angalanermut Aningaasaateqarfianut qaammammut akiliutaasartut 20,00 kr.-miit 85,00 kr.-mut qaffariartinneqarluni.

Aammattaaq nuannaarutigaarput, naartunermi erninermilu akissarsiaqarluni sulinngiffeqartarneq sapaatip akunnerinik isikkanilinnik sivitsoratsigu, taamaalilluni naartunermi erninermilu sulinngif-feqartarneq manna katillugit sapaatip akunnerinik 34-nik sivilissuseqalermat, imatut aggua-taarsimasunik: sapaatip akunneri marluk erninngitsiarnermi, sapaatip akunneri 15-it erninermut atatillugu sulinngiffeqarnermi kiisalu sapaatip akunneri 17-it angajoqqaatut sulinngiffeqarnermi. Nunatsinni kattuffiit allat erninermi sulinngiffeqartarnermut sivilisuineq pisiarinikuunngilaat. Tassa nunatsinni uagut ilaasortavut taakkutuaapput tamakkiisumik akissarsiaqaatigalugu sulinngif-feqartartut.

Taaneqarsinnaasut allat ukuupput: sunngiffimmi pisortat tamarmik massakkut tapisiaqartinneqa-lerput, aamma nunaqarfeeqqaniittut. Atuarfinnut minnernut pisortat tapisiaat qaffariarput. Atuar-finni minnerni skoleinspektørit akissarsiani inissisimaffiat qaffariarput, Nuummi sunngiffimmi pisortap akissarsianut inissisimaffia qaffariarpoq, kiisalu Inerisaavimmi atorfiit ilaat tapisiaatigut inissisimaffinnilu qaffariartoqarluni.

Sumiiffinni ataasiakkaani akissarsiassatut immikkoortitat

Isumaqatigiissutitut nutaatut atuutsinneqalerpoq sumiiffinni ataasiakkaani akissarsiassatut immik-koortitat. Isumaqatigiinniaqataasut annertuumik pingaartippaat aningaasat taakku sapinngisamik pi-tuttuisuunissaat. Taammat pisussatut pisinnaasutullu isumaqatigiissutip iluani aaliangersagaqarpoq.. Isumaqatigiissutip iluani pisussatut aaliangersagaq tapimik malitseqassaaq. Isumaqatigiissutip ilua-

ni pisussatut aaliangersagaq tassaavoq pisinnaassutsimut tapisiaq. Pisinnaassutsinut tapisiaq anner-tussuseqarpoq kr. 200,00-1.500,00. Tapisiaq minnerpaaq kr. 200,00-mik nalilik tassaavoq tapi tunniunneqartartoq pædagogisk IT-kørekorteqarsimagaanni. Tapip tullia kr. 500,00-mik nalilik tassaavoq minnerpaamik 200 timenik sivisussusilimmik pikkorissarnikkut qaffassarsimalluni tunniunneqartartoq. Tapi kr. 1.000,00 tunniunneqassaaq immikkut atuartitsinermut ilinniarsi-masunut, tale- og høre-pædagogisut, bibliotekarisut, inerisaasutut, AD-mik kiisalu PD-mik ilinniarsi-masunut. Kiisalu kr. 1.500,00-t masterisut, cand. psyk.-sut cand. pæd.-itullu ilinniarsimasunut tunniunneqassallutik.

Aaliangersakkat ilaqarput pisinnaasutut taasanik. Pisinnaasutut aaliangersakkat sumiiffinni ataasiak-kaani isumaqatigiisutiginiarneqarsinnaapput. Tassani pineqarput sumiiffimmiititsiinnarniarluni tapi-siat kisalu inuttassarsiornermi tapisiat.. Taaku tapit tamarmik kr. 750,00-mik aningaasartaqarput.

Tallimangorneq 23. februar isumaqatigiisutigaarput sumiiffimmi ataasiakkaani akissarsiassatut immikkoortitat najoqqutassiat – tassani skemat immersugassat marluk sananeqarput. Skemap aap-paa pisinnaassutsimut tapisisussanut nalunaarfissatut atugassavoq. Skemallu aappaa tassaavoq sumiiffimmiititsiinnarniarluni - kiisalu inuttassarsiornermi tapisinissamik qinnuteqarnermi immer-sugassaq.

Novemberip 19.-ani 2006 isumaqatigiisutit piviusunngorput, kisiannili isumaqatigiisutit atsiorne-qarlutik piareerput aatsaat 17. februar 2007. Ungut isumaqarpugut isumaqatigiisuteqarluni atsiore-ernerup kingorna piffissaq sivisuallaq atorlugu isumaqatigiisutinik ilusilersuineq aatsaat naam-massineqartoq. Taamaammatt isumaarpugut takussutissaasoq Namminersornerullutik Oqartussat Isumaqatiginninniartarfiat piginnaanngorsaqqinnissamik pisariaqartitsisoq.

Taamaattoq sulisitsisunut tunngatillugu isumaqatigiisutissanik suli naammassisassanik peqar-pugut. Massakkorpiaq suli isumaqatigiisutigissallugu amigaatigaarput qasuersaarnissamut ullor-millu sulinngiffeqarnissamut tunngasumik isumaqatigiisut. Tamatuma piffissami qanittumi isuma-qatigiisusiorinissaa naatsorsuutigaarput.

Suleqatigiinnermi ataatsimititaliat

Suleqatigiinnermut ataatsimiititaliat maanna atuarfippaalunnguani siunertartik malillugu ingerlap-put, ajuusaarnartumilli atuarfiit amerlanersaanni suli tamaannatik.

Tamanna akuersarneqarsinnaanngilaq, kommunit akuttunngitsunik ilinniartitsisut nuttarpallaarne-rat pillugu maalaaruteqattalaartuarmata.

Atuarfiit kommunillu suleqatigiinnermut ataatsimiititaliap periarfissai paasisuussaappatigit, ilaatigut qanoq sumiiffimmiititsiinnarniarloqarsinnaanersoq, allassimasunik sulisoqarnermut politikkiliorto-qarsinnaagaluarpoq, ilinniartitsisut sumiiffimmiitiinnarsinnaanisaannik kinguneqarsinnasunik. Ullu-mikkut atuarfiit pisortallu amerlvallaat suli suleqatigiinnermut ataatsimiititaliat sulinissaat suliaqarluni inuunermi ajoqtissaannartut isigisarpaat. Siulersuisut isumaat malillugu annertuumik iliuuseqartoqartariaqarpoq, sulisitsisut paasitillugit, ilinniartitsisut tassaammata inuit piginnanillit isumassorneqartariaqartut ineriartornissamullu periarfissinneqartariaqarlutik, inuttut inuunerat suli-nermilu atugaat eqqarsaatigalugit. Tamatumani suleqatigiinnermut ataatsimiititaliat pingaaruteqarluinnartumik inissisimapput.

Isumaqatigiinniarnerni qaangiuteqqammersuni suleqatigiissitaliornissaq isumaqatigiissutigaarput, suleqatigiinnermut ataatsimiititalianut aallartilluarnissaannut aqtissiuussisusanik, iluamik suli aallartiffiusimannigitsuni.

Angalanermut aningaasaateqarfiit

Atuartitsisut Aningaasaateqarfiata siorna ilaqutaat 12-t sunngiffianni angalatippaat. Taamma amerlatigisunik angalatitsisinnaanerput taamaallaat pisimasinnaassagaluarpog ukiut pingasukkaarlugit, sulisitsisut angalanermut aningaasaateqarfimmut akiliutigisartagaat isumaqatigiinniarnerni qaffatsissimannigitsuugutsigit. Ilaqutariit taakku angalareernerisa kingorna angalasimasunit qujaniartunit saaffigineqartarsimavugut.

Isumaqatigiinniarnerni sulisitsisut aningaasaateqarfimmut qaammammut akiliutigisartagaat 20,00 kr.-niit 85,00 kr.-nut qaffatsippavut. Tamatuma nassatarissavaa ukioq manna ilaqutariit 12-14 aningaasaateqarfimmit tapiiffigalugit angalatissinnaassagatsigit.

Ukiumi naatsorsuiffiusumi matumani Atuartitsisut Angalanermut Aningaasaateqarfiat 131.448,00 kr.-nik amigartooruteqarpoq, tamatumunnga patsisaavoq ukiup ingerlanerani isertinneqarimasuniit 133.535,00 kr.-nik atuinerusimanerput.

Ukioq manna naatsorsuutigaarput ilaqutariit 12-14 angalatissinnaassallugit.

Ilinniartitsisut Angalanermut Aningaasaateqarfianniit ilaqutariit 115-it ukioq manna angalatinneqassapput. Tassa inuit 325, aningaasaateqarfimmiit tapiiffigineqartussaallutik.

Ukioq naatsorsuiffiusog kingulleq eqqarsaatigigaanni, Ilinniartitsisutb Angalanermut Aningaasaateqarfiat kr. 78.081,00-nik sinneqartooruteqarpoq.

Soraarnerussutisiaqalernissamut tunngasut

Ukiup matuma naanerani soraarnerussutisiassatut ileqqaakkat nunatsinni soraarnerussutisiaqarluni aningaasaateqarfimmut nuunneqarimasusapput, soraarnerussutiaqarluni ileqqaakkat nunatsinni akileraarutitaqanngitsumik nuunneqassappata, taamaaliorusunngikkaannili ullumikkut ileqqaarfigi-samiitiinnarneqarsinnaallutik.

Ukiup qaangiuttup ingerlanerani soraarnerussutisiaqarluni aningaasaateqarfiit assigiinngitsut oqaloqatigisarsimavavut, aningaasaateqarfillu ataaseq isumaqatigiissuteqarfigileraluarlutigu. Aningaasaateqarfilli taanna isumaqatigiissutiginiakkatasinnit qimarratiginnippoq, DLF-ip aningaasaateqarfimmik allamik suleqateqalersimanera kamasutigisimagamikku, uatsinnullu tutsillugu.

Siulersuisut suli periarfissanik asigiinngitsunik misissuipput. Iliuusissaq ukiup matuma naannginnerani nassaarineqarsimassaaq.

AAQQUSSUSSINERMUT TUNNGASUT

Kattuffik

Ullumikkut ilinniartitsisunut meeqqat atuarfianneersunut kattuffiuvgut. Kingullermik Sinniisoqarfiup ataatsimiinnermini kattuffiup malittarisassai allannortippai, ilinniartitsisut meeqqat atuarfiata avataaneersut aamma ilaasortannornissaannut periarfissillugit.

Ilinniartitsisunit allaniit uatsinnut ilaasortanngorusuttoqarsinnaaneraniq soqutiginnittoqarsinnaanera misilillattaarsimavarput, taamatullu malugisimallugu ilaasortanngorfigisalluta soqutiginnittoqartoq. Suliaq tamanna siulersuisut nangeqqissavaat. Kattuffimmik nukittuumik pilersitserusuppugut, ilinniartitaanerit isumaqatigiinniarnernullu nukittulluta kimeqarlualutalu iliuuseqartuarsinnaaqulluta.

Ilaasortat

Ullumikkut 1200-nik ilaasortaarpugut siorna 1172-nik ilaasortaarsimalluta.

Tasa siornamut sanilliullugu 28-nik amerleriarsimavugut, ukiut kingulliit 1170-it missaanniittuarsimalluta.

Qaffaallalaarsimaneerannut pequtaasut marluusinnaapput, siulleremik ukioq 2006 tassavoq ukioq isumaqatigiinniarnersuq, tamatumanimi kattuffeqarnissaq pisariaqarsimalluni appaattullu tassaa-sinnaalluni atuartitsisut maanna atorniarsinnaanerit periarfissinneqarsimammat.

Ukiumi atuarfiusumi 2008-mi aallatittumi meeqqat atuarfianni ilinniartitsisut atorfitt ilkilissu-saapput 11. klasset atorunnaarsinneqarnerannik tunngaveqartumik, tasslu ukiumi tassanngaanniit atuarfimmut peqqussut 2002-meersoq tamakkiisumik sunniuttussaalluni.

Ukioq manna ilaasortat saaffiginnittarneranni aallaviunerpaat tassaasimapput sulinermit piffissamik atuinermut tunngasut kiisalu sulinermit atugarisat.

Ilaasortanik ataatsimiititsinerit

Isumaqatigiinniarnersit naammassimmata siulersuisunut ilaasortat allaffimmilu sulisoq sinerissami ilaasortanut ataatsimiititseqattaarnikuuvugut.

Paul Raahauge: Kangerlussuatmi martsip naalernerani ilaasortanut ataatsimiititsivoq, tasani suliasa-nut pilersaarutit sammineqarlutik atuarfiup pisortaa peqatigalugu. Suliaq tamanna annertuumik paasiniaanernik nassataqarsimavoq, kisinnili inissitassat inissinneqarsimapput – ilaasortat iluaru-suutigisaannik.

Sapaammi 19. november isumaqatigiinniarnersit naammassinerisa kingorna ataasinnigornermit Nar-samut ingerlavoq, ilaasortanillu ataatsimiititsilluni, isumaqatigiissutit imarisaat pingaarnertut sam-mineqarlutik. Ilaasortat affaasa missaat ataatsimiititsinermit peqataapput, naak ataatsimiititsinissaq piffissap nallerluinnarnerani atsaat nalunaarutigineqaraluartoq. Ataatsimiinnermit suliat ingerlanneqarnerinut iluarusunneq oqaatigineqarpoq. Marlunngornermit 21-ani umiatsiamik Qaqortumut ingerlaqippoq, atuareernerullu kinguninngua ataatsimiititsisoqarluni, ataatsimiinnermit ilaasortat 25-t missaat peqataapput, aammattaaq tamatumani isumaqatigiinniarnersit angusaq iluarusuutigineqarpoq. Nanortallip atuarfiani ilaasortanut ataatsimiititsineq sisamanngornermit 23-ani ualikkut ingerlanneqarpoq. Ilaasortat amerlasuut takkapput, isornartorsiueraluttumillu apeqqutit saqqummiusunneqarput, kisiannili angusaq amerlnerpaanit iluarusuutigineqarluni.

Johan Reimer: Uanga ataatsimiititsiffigisakka tassaapput: Gammeqarfik, Ado Lynge-p Atuarfia, Atuarfik Kristian Lundblad kiisalu Nikolaj Rosing-p Atuarfia.

Aasianni Gammeqarfimmi ilinniartitsisut immikkoortortakkaarlugit, kiisalu Ado Lynge-p Atuarfi-ani ilinniartitsisut, isumaqatigiissutit pillugit nassuiaanneqarlutik ataatsimiisinneqarput. Ataat-simiinnerit ilinniartitsisut amerlanerpaat peqataaffigivaat. Taamatuttaaq december tallimaani Nia-qornaarsummi kingornalu Kangaatsiami ilinniartitsisut ataatsimiisinneqarput. Ataatsimiisitsinerit

ulluinnarlugu angalalluni ingerlanneqarput, taamaattumillu annertunerusumik kattuffiup ingerlanerani allanik imaqaratik. Isumaqatigiissutinik saqqummiinnerit tamani iluarisimaarneqarput aamalu angusanut isumalluortoqartoq malunnarpoq.

Sivso Dorph Esther Rosingilu Nuummi ilaasortanut ataatsimiititsipput isumaqatigiinniarnernit ullut marlussunnguit qaangiunnerannit Atuarfik Samuel Kleinsmidtip katerisimaartarfiani. Ataatsimiinnermi ilaasortat 70-80 peqataapput. Takkussimasut akornanni isumaqatigiinniarnerni angusaq iluarisimaarneqarpoq.

Decembarip ingerlatilaarnerani Sivso Dorph Maniitsumi, Sisimiuni kiisalu Ilulissani ilasortanut ataatsimiititsivoq, aamma taakkunani isumaqatigiinniarnerni angusat pingaarnertut sammineqarlutik, taakkunani aamma ilaasortat allanut tunngasunik samminninnissamut periarfissaqarlutik. Sumiiffinni assigiinngitsuni isumaqatigiinniarnerni angusaq iluarisimaarneqarpoq. Illoqarfinni ataatsimiititsiffiusuni ilaasortat affaat inorlugit takkuttarput.

Atuarfiit ilaanni, atuartut aqukkuminaatsut amerliartupiloortutut oqaatigineqarput. Tamanna ajornartorsiutinik assigiinngitsunik pilersitsisarpoq, tassa atuartitsinnermut tunngasunut kiisalu atuarfimi inooqatiigginermut tunngasunut.

Atuarfinni assigiinngitsuni ilaasortanut ataatsimiititsinerup saniatigut Ilulissani Immikkut Atuartitsinnermut Qitiusumi ilinniartitsisut ataatsimeeqatigaakka. Atuarfik taanna sinerissamiit atuartunit annertuumik immikkut atuartinneqarnissamut pisariaqartitsisunit atuariartorfiuvoq, tasanilu ilinniartitsisut ilinniutissanik annertuumik namminneq sanaartortuupput.

Mikkle Lybæch Tasiilami Alivarpimmi isumaqatigiissuteqarluni atsiorsimatsiarnermit ullut marlussunnguit qaangiunneranni ataatsimiititsivoq. Ilinniartitsisoqatigiinnit soqutiginninneq annertuvoq takkuttullu amerlallutik. Isumaqatigiinniarnernit sivisunerujussuat eqarsaatigalugu ilinniartitsisut isumaqatigiinniarnernit inernerat tusalullugu pissanngatigisimavaat, tasanissaa isumaqatigiissutit inernerat iluarisimaarneqarpoq. Ukiunut aaliangersimasunut Tunumi atorfinitsitsisarnermut tunngaasunut pitsanngoriaatsit ilinniartitsisussaqarniarnermut sunniutissaat pissanngatigineqarpoq.

Kiisalu decembarimi 2006 Paamiuni ilaasortanut ataatsimiititsineq pivoq. Allaffimmi sulisorput Lisbeth Frederiksen ulluni pingasuni Paamiuniippoq. Ullut taakku pingasut atorluarneqarput. Sinniisutsinnik, atuarfiup pisortaanik, aqutsisoqarnermi pisortamik kiisalu ilinniartitsisunik ataasiakkaanik ataatsimeeqateqarnernut unnuillu marluk ilaasortanik ataatsimiititsinnermut.

Unnuit tulleriiginnaagaluartut pineqartut marluk ilaasortanit amerlasuunit peqataaffigineqarput. Unnuk siulleq isumaqatigiissutit nutaat sammineqarput apeqqutissarpasuillu saqqummiussorneqarlutik. Ataatsimiinnermi isumaqatigiinniarnerni angusat iluarisimaarneqarluarput. Unnuit aappaanni ataatsimiititsinnermi qulequttat tasaapput suleqatigiinnermut ataatsimiititaliaq kiisalu sulivimmi avatangiisinut inatsisit. Tamatumani aamma apeqquterpassuit sammineqarput, tasanilu pisortanik ilinniartitsisunillu oqarirtuutigineqarpoq suleqatigiinnermi ataatsimiititaliaq pingaartillugu ingerlanniarneqassasoq.

Siulersuisut

Piffissami qaangiutilersumi siulersuisut quleriarlutik ataatsimiittarsimapput. Ataatsimiittarsimanerit ukiunut siuliinut sanilliutissagaanni allaassuteqarput, tassa ataatsimiinnerit arfineq marluk kater-suulluni ataatsimiinnerusimammata, pingasullu oqarasuaatikkut aataatsimiinnerusimallutik. Nali-

nginnaasumik pisartuniit allaanerunerannut peqqutaavoq isumaqatigiinniarnit arlaleriarlutik ingerlanneqarsimanerat. Tassa siulersuisunut ilaasortat sinerissameersut Nuummukattariaqartarsimapput, taakkulu isumaqatigiinniariartorlutik Nuummiinnerat iluatsillugu siulersuisuni ataatsimiinnerit ingerlanneqartarsimallutik.

Siulersuisut ataatsimiittarnerini piffissartornerpaaffiusisoq tupinnanngitsumik tassaapput isumaqatigiinniarnit aammattaq atuarfik pillugu ataatsimeersuartitsinissaq Naleqqiiffik. Isumaqatigiinniarnit sivisussusaata nukiit annertuut tigusimavaat, tamatumalu aamma kingunerisaanik sinerissami angalanernik aamma ilaqarnikuullutik.

Naleqqiiffik ingerlanneqassaaq Sinniisoqarfiup ataatsimiinngitsiarnani. Ataatsimeersuartitsinisamut siulersuisut sammisassanik qulequttanik tallimanik toqqaasimapput, ukuusunik: Pisortatut ingerlatseriaatsit, atuartitseriaatsit nalilersuerialaatsillu, sullivimmi avatangiisit kiisalu inuiaqatigiit isumassuisut, qulequttat taakku tassaapput atuarfinni akuttunngitsumik oqallisaajuartartut.

Naliliinerput malillugu siulersuisuni suleqatigiinnerput pitsaasuvoq, immikkut tamatta nukittuffeqaratta.

Aningaasaqarniarneq

Ukiup ernerneraa tassaavoq kr. 602.000,00-inik sinneqartooruteqarneq, tamannalu naammagisi-maarnartutut nalilerparput. 2005-imut sanilliullugu 326.000,00 koruuninik pitsanngoriammut tungavipuut pikkorissaanert ataatsimiititsinerillu 2970.000,00 koruuninik ikileriarsimanert, allaffisornermi aningaasartuutit 132.000,00 koruuninik ikilerirsimanerat kiisalu inatsilerituumik ikiorteqarnerup 161.000,00 koruuninik annikilleriarsimanert.

2007-mut missangersuutini 500- 550.000,00 koruuninik amigartooruteqarnissarput massakku-gallartoq naatsorsuutigaarput, tamatumani Naleqqiiffimmi ingerlatsinssatsinni aningaasartuuteqarnerunissarput peqqutaalluni, aammattaarlu sinniisunik pikkorissaanissat Sinniisoqarfiullu ingerlanneqarnissaannut aningaasartuuteqarnerunissaq ilimagineqarluni.

Allattoqarfik

Allattoqarfik ullumikkut pingasunik sulisoqarpoq taakku saniatigut ilinniarnertuunngornianik ikiorteqartarluta.

Allattoqarfitsinnut atorfinitsitseqaraasaraluarluta suli atorninitsitsinngilagut, kisiannili suli naatsorsuutigaarput piffissami qinittumi atorfinitsitsinnaanissarput.

Ulluinnarni ingerlatsinitsinni nalinginnaasumik ilaasortat saaffiginnittarnerisa saniatigut pisortat amerliartortut saaffiginnittarnerat aamma malugisimavarput. Tamanna soorunami nuannersuvoq, ilaasortatsinummi tamanut sullisserusukkatta.

Tatigisatut sinniisunik pikkorissaanert

Ukiup ingerlanerani tatigisatut sinniisunut pikkorissaaneq ataasiinnaq ingerlanneqarsimavoq, tassa Sisimiuni sinniisuunita Ulla Nielsenip Sisimiut kommuneani sinniisoqatini novembari qaammat pikkorissarmagit. Pikkorissaanermi sammineqsimapput isumaqatigiissutit, sulinermi piffissamik isumaqatigiissut, suleqatigiinnermi ataatsimiititaliat kiisalu siinniisutut sulineq.

Nunaqarfinni atuarfiit pisortaasa ataatsimiinnerat kiisalu inatsisilerineq pillugu pikkorissarneq

IMAKi nunaqarfinni atuarfiit pisortaat pikkorissartinneqarmata inatsisinullu tunngatillugu pikkorissarneqarmata piffissap ilaa peqataavoq. Inerisaavik pikkorissarnerup aaqqissuunneqarneranut ingerlatsisuuvoq. KANUKOKA IMAKilu saqqummiusseqataapput eqaatsumik pilersaaruisiornermut tunngatillugu. Aammattaq IMAK saqqummeeqataasutut peqataavoq inatsisinut pikkorissaanermi, tamatumani pikkorissaasuulluni IMAKip siusinnerusukkut allaffiani pisortaasimasoq Annette Poulsen.

Pikkorissaanermi sammeneqarput malitassat qanoq tullerriaarneqartarnersut, pisortatut suliasisinnaatitaanerit, suliasanut tunngatillugu malitassat matuma ataani tusarniaasussaataitaaneq, isumaqatigiinniartarnerup aaqqissugaanera, pisortaqarfinni paasissutissisussaataitaaneq il. il. Suleriutsimi saqqummiisoqariarluni suliasisioqartarpoq, peqataasullu misilikkakkaminnik atuisinnaanertik pikkoriffigilluinnarpaa. Tamatumaa nassatarisarpaa malitassat ulluinnarni atukkanut sanilliuttaqartaartuaannarsinnaaneri. IMAKip naliliinera malillugu, peqataasut tamarmik annertuumik pissarsisut, uatsinutaaq iluaqutaasumik tamatta immitsinnut kiinarsilluta.

Danmarks Lærerforening

2005-imi aprilimi Ilulissani Sinniisoqarfiup ataatsimiinnerani Hans Danielsen siunnersuummik saqqummiivoq, siulersuisut sulissuteqaqullugit Danmarks Lærerforeningimit anianiarnissamut periarfissanik misissueqqusilluni. Hans Danielsenip tunngavilersuutigaa akiliutaasartut sisamararterutaanik anginerusoq Danmarks Lærerforeningimut ingerlaqqittamat.

Siunnersuut tunngavigalugu taamanikkut siulersuisut neriorsuipput, Danmarks Lærerforeningi suleqatigalugu suleqatigiilioraqassasoq, suleqatigiinnermut tunngasunik misissuisussanik. Taanna tunngavigalugu taamanikkut hans Danielsenip siunnersuutaa itigartinneqarpoq. Suleqatigiillu ukuninnga inuttaqartut tamatumaa kingorna suliaqarnikuupput: Sivso Dorph, Esther Rosing kiisalu Lisbeth Frederiksen IMAKimiit kiisalu Anders Bondo Christensen, Lotte Lange, hans Ole Frostholt kiisalu Birgitte Thaae Danmarks Lærerforeningimiit. Taakku oqaloqatigiittareerlutik ilaatigut makkuninnga isumatigiissuteqarput:

- **Folkeskolen pillugu:** Siunissami saqqummersitaq ataaseq atuarfinnut misikunut tunniunneqartalissaaq, tallimat atuarfinnut akunnattumik angissusilinnut arfineq pingasut atuarfinnut angineranut. Ullumikkut nunatsinni atuarfiit mikisut 49-upput, 18-it akunnattumik angissusillit kiisalu 18-it atuarfiit angisuut. Taakku saniatigut siulersuisunut ilaasortat kiisalu sinnisut tamarmik immikkut pisassapput.
- **Atuartitsisunut atukkiisinnaaneq:** Atuartitsisunut atukkiisinnaaneq maanna ammaanneqarpoq. Lån og Spar atukkiisartutut allatuulli atorniartut ataasiakkaat pillugit akiliisinnaasusiannik misissuisassaaq, aammattaq atukkiinnermut atatillugu toqqaannartumik akissarsianiit tiguisinnaanissaq isumaqatigiissusiorfigineqarsinnaasassalluni.

Atuartitsisut atorniarnermik qinnuteqaatitik IMAK aqutigalugu nassiuttassavaat kattuffimmiillu uppersartillugit. IMAKi atuartitsisunut atukkiisinnaanermut assigiinngitsunik piumasaaqateqassaaq atukkiisinnaanermut innersuussuteqarniaruni makkuninnga:

- ukiut marluk atuartitsisutut atorfeqarsimanissaat KIISALU IMAKimut ilaasortaanissaq
- minnerpaamik 26-nik ukioqarnissaq
- illoqarfiit, nunaqarfiit avinngarusimasullu ilinniartitsisussaaleqiffiusut (atorfinitsitaanermi qulakkeerinninnerupput)

Aaqqissuusineq upernaakkut 2009-mi nalilersorneqassaaq.

- **Ilinniartitsisunut ullorsiutit pillugit:** IMAK ullorsiutinut ilanngunneqartartussanik qupper-sagaliussaaq nunatsinni pissutsinik imaqartunik.

Qupper-sagaq ullorsiutillu IMAKimit nassiussuunneqartassapput, taakku sinerissamut ingerlatseqqisarmata

- **Ilaasortat allattorsimanerat:** Siunissami ilaasortat allattorsimaffiat IMAKip nammineq ingerlatissavaa.

DLF-imi ilaasortat allattorsimaffiat qaammatikkaartumik ilaasortat allattorsimaffiannik nu-taamik nassinneqartassaaq.

Psykologimit ikiorserneqarsinnaaneq pillugu: IMAKip aaqqissugaanermullu allaffiup akor-nanni ataatsimeeqatigiittoqassaaq arlaatigu aaqqissuussamik IMAKip siunnersuisin-naananeranut periusaasinnaasunik iluarsaassinissaaq siunertaralugu.

- **Ilaasortaannermut akiliut:** Oqallinneq tamaat isigalugu oqallisigineqartuni ilaatigut isuma-qatigiissutigineqarpoq ilaasortaannermut akiliuk maannamiit akiliutaasartumut sanilliullugu affaannanngortinneqarsinnaasoq – tamanna ataatsimeersuarnermi akuerineqassapat.

2006-mi ataatsimeersuarnermi siunnersuutitut saqqummiunneqassaaq fraktion 1-3-mi ilaasor-taanermut akiliuk maannakkut ilaasortaannermut akiliutip affaannanngortinneqarniarnera (ani-ngaasap annertussusia 12-mik avinneqarsinnaassaaq). Fraktion 4-mi (utoqqalinersiutilinnut) fraktion 6-milu (immikkut ittumik ilaasortat) akiliut taamaaginnassaaq.

Akiliut ukiumut tamakkiisumut akiliutaasussaaq ukiumut naatsorsuummut ataatsimut ukiumut (1. januarimiit – 31. decemberimut) ukiup siuliani martsip aallaqqaataani ilaasortaasimasut aallaa-vigalugit nalilerneqassaaq.

Ilaasortaannermut akiliutip atugassarititaasunullu tunngasut allat naatsorsuutigineqarput 1. januar 2007 aallarnerfigalugu atuutilissasut.

Oktoberip qaammataani 2006 Danmarks Lærerforeningip ataatsimeersuartitsinerani aaliangiun-neqarpoq IMAK-p ilaasortaannerminut akiliutaa affaannanngortinneqassasoq.

Taamaattoq eqqartugassat assigiinngitsut arlallit suli inissinneqanngillat ullumikkutut allaffiup inut-tatigut inissisimanera peqqutigalugu .

Nordisk Lærerorganisationers Samråd.

NLS-p tungaaniik ukioq manna qulequttatut pingaarnertut eqqartorneqartoq tassaavoq ilin-niartitsisutut inuuniteqarnerup nukittorsarnissaa, tamammallu NLS-p aqutsisoqarfiata qulequtaq *inuttut imminut nalilersortuarnikkut ilinniartitsisinnaanermut piginnaasat nukittorsarneri* qitiu-tillugu inississimavaa.

Ukiuni kingullerni arlalinni NLS-p aqutsisoqarfiata atuartsinerup pitsaasuunissaata pingaartittuarsimavaa, malitsigisaanillu oqallilluaataasarsimavoq interneti aqutigalugu NLS-llu aqutsisoqarfiata avataani. Aqutsisoqarfik isumaqarpoq ilinniartitsisut nammineerlutik ilinniartitsissutissamik pitsaassusiannik naliliisarnerat sakkugissallugu pitsaanerpaasoq, atuarfimmu ilinniartitsisunulluunnit pissutissaqanngitsumik isornartorsiuisarnelit illuatugilissagaanni. Inuttut imminut nalilersortuarnikkut ilinniartitsisinnaanermut piginnaasat nukittorsarneri suliniutip inernissaanut upperinartuunissaanullu iliuusissaq suliamut pingaaruteqarluinnartuuvuq ilinniakkallu pitsaassusaata nalilerneqarnerini assigiinngitsunik annertuunik sunniuteqartussaalluni.

Aqutsisoqarfik ilaasortami kattuffii aqutigalugit qulaarniarniarpaa atuarfiit, suliffeqarfiit ilinniartitsisullu qanoq ilillutik innimut nalilersortarneri qanorlu inernerusimasunik atuisoqarnerisoo. Misisuinerup taassuma anguniagarivaa NLS ilisimasamik misissuinerup inernerinik tunissallugu, qanoq ilillutik nunani avannarlerni atuarfiit, suliffeqarfiit ilinniartitsisullu iluminni suliamik pitsaassusaanik naliliisarnersut, suliaq tamanna qanoq ingerlanneqartarpa, suna nalilersorneqarpa inernerillu qanoq atorneqassappat. Misissuinerup anguniagaasa ilatut taaneqarsinnaavoq NLS-p misissueqqissaarnissamik periarfissamik tuninissaa, inuttut imminut nalilersornissamut sakkussamik inerisaaqqiineq. Taamaammatt aqutsisoqarfik aaliangerpoq suleqatigiinnik pilersitissalluni kattuffinniit makkunanga peqataaffigineqartunik: Danmark, finland, Norge aamma Sverige. Suleqatigiit naatsorsuutigaat februarip qaammataani suliaminik aallartitsissalluni. Suleqatigiit junip qaammataani ataatsimiilerunik suliaminnik saqqummiissapput.

NLS-p immikkoortoqarfii assigiinngitsut septemberip qaammataani Islandimi katersuupput Qulequttat oqallisigineqartut ilagaat ilinniartitsisut akissarsiaat sulilernerimi isumaqatigiissutit kiiyasalu – atugassarititaasut. Nunani avannarlerni allani misillitagaqarfiooreerpoq pissutsit assigiinngitsut tunngavigalugit sumiiffinni akissarsiaqarneq tunngavigalugu isumaqatiginninniartarnerit.

Massakkumut ilaatigut takussutissaqaleriartorpoq, nunat ilaanni sumiiffimmi isumaqatiginninniartarnermiit qitiusumik isumaqatiginninniartarnerit uterfigeqqikkiartuaarfigineqarmata, ilaalli aamma illuanut ingerlallutik. Aammattaaq maluginiagassaavoq ilinniartitsisutut inuuniuteqarnermi inuttaq pineqaleriartuarmat qillilersugaatsumillu namminersornermik ingerlatsinnaaneq annertusiartorluni. Kattuffinnut suliasaq tassaassaaq, pissutsinut tamakkununnga qanoq isummersinnaassanersugut, uagut inuuniutitsinnut sulinermi akissarsiatigullu atukkatigut angusaqarniarluta iliuuseqartarnitsinni.

Sullivimmi avatangiisit / Kalaallit Nunaanni Suliffigissaasut

Suliffigissaanermik siunnersuisoqatigiit 2006-imi pingasoriartutik ataatsimiissimapput, pingarnerut ataatsimiissutaasarsimallutik avatangiisinut inatsisitaap malittai eqqartorneqartarsimallutik. Uani pineqarput nalunaarutissat inatsimmik tamakkerlersitsisussat.

Massakkorpiatq sullivinnik naliliisarnermut (APV) nalunaarutissaq suliarineqarpoq. Ministerip siunnersuutaani siunnersuutigineqarpoq sullivik qanoq angitigigaluaruniluunniit sullivimmik nalilersuinissamik ingerlatsiviusinnaalissasoq, kisiannili suliffiit mikinerit aatsaat 2010-miit, anginerillu 2008-miit.

Kattuffippat IMAK kiisalu PIP PK-lu sinnerlugit suliffeqarfiit tamarmik ataatsikkut aallartinnissaat anguniarneqassasoq. Kattuffiit taakku pingasuullutik isumaqarput, suliffeqarfinni minnerusuni annerusunilu sullivimmi avatangiisitigut, timitaasigut atukkatigullu ima ajornartorsiuteqartoqartigisoq, tamakku aaqqinneqarsinnaassagaluarlutik siunnerfeqarluni qanoq iliuuseqartoqartuuppat. Sullivimmik nalilersuinermi qulakkeerneqarussoavoq anguniagaqarluni qanoq iliuuseqar-nissaq.

Aaliangersakktat tamanut atuuttsussanngortinneqassanersut aatsaat qaammaterpaalunnguit qaangiuppata aaliangiiffigeqassaaq. Tamatumunnga tunngaviuvoq kattuffiit ataatsimoorussumik inassuteqarnissaq isumaqatiginngissutigimmassuk. Aammattaaq ministeri atuuttussamik aaliangiinnginnermini nunatsinni naalakkersuisut inassuteqaataat tusarniaqqaartussaammassuk.

Pinngitsoorneqarsinnaanngilaq malitassat nutaat pillugit ingerlaavartumik paasissutissiillunilu ilitersuisarnissaq. Taamaattumik nunatsinni suliffigissaasut sulisoqarnermut ministerimut sinaakkusissap

- annertusinissaanik qinnuteqarnikuupput, ukununnga:
- qulakkiissallugu, suliffigissaasut qarasaasiakkut nittartagaata annertuumik ineriartortinnissaanut naammassinnissalluni
 - qulakkiissallugu, suliffigissaasut sullivinnik avatangiisinik aallussinerata ingerlatissiinnarnissaanut
 - qulakkiissallugu, paasititsiniaanerit ilaasa suliffeqarfinnut minnernut toqqaannartumik ingerlanneqarsinnaanissaa, matumani ilaatigut eqqarsaatigineqarpoq sullivinnik naliliisarnerup eqqunneqarnissaa
 - qulakkiissallugu, sullivimmi atukkat aallunneqarnissaat, takuneqarsinnaalereermat sullivimmi atukkat nanertuutaanerisa annertusigaluttuinnarnerat, tamatumunngalu ilutigitiillugu iliuseqarfiginissaat piunneqarfigineqarluni, sakkusanilli amigaa-teqartoqarluni.

IMAKip kajumissaarutigissavaa suliffeqarfii sullivinnik naliliisarnermik ingerlatsinissaat pingartutut inississagaat, tassami sullivimmi atukkat siunertaqartumik aaqqinniarlugit iliuseqarnerit sulisumut, sulisitsisumut tamatumalu nassatarisaanik atuartunut inuiaqatigiinnullu iluaqusiissusaammata.

IMAKip ilisimavaa, atuarfiit ilaat suliamik tamatumunnga aallartitsereernikuusut, tamannalu inassutigineqarsinnaasoq. Takuuk www.at.gl tassani attaveqaatit arlallit iserfigisinnaavatit, taakkunanilu suliap qanoq ingerlanneqarnissaanut aamma siunnersuuteqarluni.

Sulisitsisup akisussaaffigivaa suliap sularineqarnissaa malittaasalu sularinissai. Kisianni eqqaamallugu suleqataasut tamarmik akuutinneqartussaammata, taamaanngippat suliassaagalugit amusarisap iluani pappialaannangussammata iliuseqarfigineqanngitsut, tamannalu inerneqartinneqarneq ajorpoq.

Sanaartorneq

Allaffitsinnik massakkut annertuutigut naammassisimalerpoq, ataasiakkaannguit annikitsut suli inissitassaagaluartut.

Allaffippat maanna qaammarnikooqaaq inittorlunilu, tamatta iluarusuutigisatsinnik.

Piginnaasat ineriartortinnissaat pillugu siunnersuisoqatigiit

Piginnaasat ineriartortinnissaat pillugu siunnersuisoqatigiinnut nalunaarummi ilaatigut ima allasimasoqarpoq:

”§ 1. Naalakkersuisut inuutissarsiutinik ilinniartitaanermi piginnaasat ineriartortinnissaat aammalu suliffissaqartitsiniarnermi inuutissarsiutinillu ilinniartitaanermi pilersinneqartut ataatsimut aaqqissugaanissaassa nukittorsarneqar-

nissaat anguniarlugu Piginnaasat ineriartortinnissaat pillugu siunnersuisoqatigiinnik Naalakkersuisunik siunnersuisartussanik pilersitsipput. *Imm. 2.* Siunnersuisoqatigiit Naalakkersuisunit suliassiissutigineqartut sularisassavaat innersuussuteqarlutillu. Siunnersuisoqatigiit suliassat sulluunniit sularisinnaavaat, Siunnersuisoqatigiinnit pissusissamisoortutut isigineqartut. *Imm. 3.* Siunnersuisoqatigiit innersuussuteqarnerminni ajornartorsiutinut pisunut nassuiaataasinnaasunik misissueqqissaartitsisinnaavoq takussutissior-titsisinnaallunilu, tamatumunnga ilanngullugit ajornartorsiutit piffinni ataa-siakkaani nunallu immikkoortuini pisut. *Imm. 4.* Siunnersuisoqatigiit ukiumoortumik suliartik pillugu sammisallu iluani ineriartortitsineq pillugit Naalakkersuisunut nalunaarusiortassapput kingusinnerpaamik majip aallaqqaataa nallertinnagu.

§ 2. Siunnersuisoqatigiit sulinerminni:

- 1) Inuussutissarsiutit ineriartortinneqarnerisa, suliffissaqartitsiniarnerup inuutissarsiutinillu ilinniartitaanerup suliarnik ingerlatsiner-mi illuatungeriit akornanni ataatsimut aqqissugaanissaat imminnullu attuumassuteqarnissaasa eqqanaarneqarnissaat peqataaffigissavaat.
- 2) Inuussutissarsiomerup uummaarissup pilersinneqarnissaata ineriartortitsinikkullu suliffissaqartitsiniarnerup eqaatsumik ingerlasuunissaasa aqqu-tissiuunneqarnissaat anguniassavaat aammalu inuutissarsiutinik ilinniarti-taanerup immikkuullarissumik nalinginnaasumillu piginnaasanik ineriartortitsiner-mik eqqanaarisup pilersinneqarnissaa aqqu-tissiuutissallugu.
- 3) Suliffissaqartitsiniarnermi ilinniartitaanermilu piginnaasanik ineriartortitsiner-mi piffissami sivikitsumi atuuttussanik siunissarlu ungasinnerusoq eqqarsaatigalugu atuuttussanik pisariaqartinneqartut aqqiivigineqarnissaat anguniassavaat.
- 4) Suliniutinik inatsisiliornikkullu ilusilersuinernik siunnersuusiortassapput, taakku aqqu-tigalugit suliarnik ingerlatsiner-mi illuatungeriit pisortallu piginnaasat ineriartortinneqarnissaannut pisariaqartitsiffiusuni aningaasaleeqataanis-saannik kajumilersinneqaqqullugit.
- 4) Siunnersuinerminni inuuneq naallugu ilinniarnermik oqartarnerup naleq-

- quttumik pilersitsinikkut imaqartinneqarnissaa anguniassavaat.
- 5) Nunami tamarmi inuussutissarsiornikkut ineriartortitsinerup, inuutissarsiutinik ilinniartitaanermi suliffissaqartitsiniarnermillu suliniutit malittarissavaat, suliffissaqartitsiniarnerup inuutissarsiutinillu ilinniartitaanernut eqaatsumik iluseqartinneqarnissaa aqutissiuutissallugu aammalu sulisut tamar-mik piginnaasaannik ineriartortitsinissap eqqanaarneqarnissaa peqataaffigissallugu.
- 6) Inuutissarsiutinik ilinniartitaanerup ineriartortinneqarnera malittarissavaat, ilinniartitaanerillu pitsaassusaat, ineriartortinneqarnerat, naleqqussarsinnaasuseqarnerat ilinniakkallu ataasiakkaat immikkoortuini ataqatigiissarineq pillugu innersuussisassallutik.
- 7) Sulisitsisut inuutissarsiutinut ilinniartitaanermut akiliutaat pillugit ataatsimiititaliap (AEB-nævn) aalajangiussaata malinnaaffigissavaat.
- 8) Naafferartumik ilinniartitseqqittarnerni piginnaasallu ineriartortinnissaat pillugu pilersinneqartut ilusilersorneqarsimanerisa nakkutigineqarnerat peqataaffigissavaat siunnersuiffigisassallugulu.
- 9) Apeqqutit pitsanngorsaataasinnaasut pilersitsinernullu siuarsaaneq sulinerminni ilanngutissavaat, ilinniartitaanerup iluani pilersinneqartut pingaartuutillugit.
- 10) Sumiiffinni ataasiakkaani nunallu immikkoortuini attuumassuteqartut peqatigalugit sumiiffinni ataasiakkaani nunallu immikkoortuini suliffissaqartitsiniarnermi inuutissarsiutinillu ilinniartitaanermi suliniutit aaqqissuunneqarnerannut siunnersuuteqartassapput aammalu piffinni ataasiakkaani nunallu immikkoortuini suliniutit nuna tamakkerlugu suliniutinut tulluarsar-neqarnerat peqataaffigissallugu.”

Piginnaasat ineriartortinnissaat pillugu siunnersuisoqatiginnuut nalunaarussiaq siorna sep-tembarimili atuutsinneqalersimasussaagaluarpoq, kisiannili ukioq manna 2007 aatsaat febru-ariq aallaqqaataani atuutsinneqalerluni.

Piginnaasat ineriartortinnissaat pillugu siunnersuisoqatigiit maanna ukiut marlussuit atuu-simalerput, allatulli katitigaanikuugaluarlutik. Maanna Piginnaasat ineriartortinnissaat pillugu siunnersuisoqatiginni ilaasortaavugut, tassa katuffiit, AK, ASG, PPK, TP aamma PIP peqatigalugit ilaasortanik marlunnik toqqaanikuugatta. Siunnersuisoqatigiit septem-barimiilli maannamut marloriarlutik ataatsimiinnikuupput.

Maaji qaammat ILO-mi sulisut nunatsinnukassapput. Taakku misissuiffigissavaat nunatsinni naalakkersuinikkut ingelatsinermi qanoq iliuseqartoqarniartillugu kattuffiit iliuseri-
niakkanut akuliutsinneqartarnersut, aammattaaq kattuffiit akuliutsinneqartarnerminnik
naammagisimaarinersut misissuiffigiartorlugu.

ICC

ICC ataatsimeersuarpoq Utqiagvik / Barrow-mi Alas´kami ulluni 9. – 14. juli 2006. Esther
Rosing IMAK sinnerlugu peqataavoq. Uku oqaluuserisassaniipput:

1. Naalagaaffiit Peqatigiit (FN)/ Silarsuarmioqatigiit oqallittarfii
2. Ineriartornerup nassatai
3. Piginnaangorsaannermut tunngasut
4. ICC-ip nutarterneqarnera.

Ataatsimeersuarnermi oqallisigineqartut annertuut tassaapput silaannaap allangoriartornra,
tamatumalu aalisartortatsinnut piniartortatsinnullu sunniutai. Ullut pingajussaanni Jens
Jakobsen Inerisaavimmiit atuarfimmud peqqussut nutaaq pillugu (Atuarfitsialak) saq-
qummiivoq. Saqqummiisoqareermat Esther Rosing IMAKi sinnerlugu isummorsor-
nissaminut periarfissaqarpoq ukulu saqqummiullugit:

1. „Atuarfitsialak“ suli tamakkiisumik atuutilinngitsoq
2. Ilinniartitsisussaaleqinerujussuaq
3. Ajornartorsiutit meeqqanik sumiginnaanerujussuup nassatai
4. ICC-ip iluani IMAKip ilinniartitsisunik suleqateqarnissamut
soqutiginninnera.

ICC ukiuni tulluuttuni sisamani allangorsarneqassaaq, tassanilu isummerfigalugu kattuffik
suleqatigiinnermut suleqataarusunnersoq. Aqqaluk Lynge nunarput sinnerlugu siulittaasutut
qinigaqqippoq kiisalu ICC nutaamik atertaarpoq taaguuteqalerluni Inuit Issittormiut
Siunnersuisoqatigiivi.

PIP kattuffiillu allat

Nunatsinni kattuffinnik allanik akuttunngitsumik ataatsimeeqateqartarnerput suli ingerlap-
parput. Ataatsimeeqatigisartakkavut tassaapput: PIP, AK, ASG, PPK kiisalu ilaannikkoo-
riarluta TP.

Ataatsimeeqatigiinnerni taakkunani eqqartortakkavut ilaatigut tassaapput isumaqatiginnin-
niarnerit, nunatsinni naalakkersuinikkut ineriartorneq kiisalu qulequttat aaliangersimasut,
arlaata oqaloqatigiissutigerusullugu kissaatigisimasaat. Ataatsimiittarnerit qaammatikkaar-
tumik ingerlakkajunneqartarput, kisinnili piffissami kingullermi ataatsimiittarnivut akut-
torsimapput tamatta immikkut ulapputeqarnerput pissutigalugu.

KANUKOKA

KANUKOKA uatsinnut tunngassuteqartunut nutaamik siunnersortimik atorfinitsit-sinikuuvoq, tassani nunatsinni atuarfiit ingerlanneqarnerinut siunnersortimik. Naliliinerput tunngavigalugu sulik kattuffimmik suleqateqarluarpugut, naak tusagassiutinut oqaaseqarnerit ilaanni oqaatigineqarsimagaluartoq, ilinniartitsisussaaleqineq pillugu suleqatigiinnut ilaatinneqarnissarput pisariaqartuunngitsit. Isumarput malillugu kommunit tamatumani naliliinerlunnerat piaartumik aaqpinneqartariaqartoq.

Isumaqatigiinniarnernut atatillugu isumaqatigiissutiginiikuuarpud, suleqatigiiliorniarluta, suleqatigiinnermut ataatsimiititaliat siunertartik malillugu sulilernissaannut aqutissiuus-sinissaq siunertaralugu.

KIIP

Siorna ukiup aallartinnerani naalakkersorisimasarput novembarip ingerlanerani allamik taar-serneqarpoq. Taamanikkut naalakkersuisuusoq suleqatigillu aleriartuleraluarpud, ilaatigut makku pillugit oqaloqatiginikuullutigu: ilinniartitsisussaaleqineq pillugu suleqatigiili-ornissaq, atuarfiit illutaat, alloqatigiissaarluni atuarfimmik ineriartortitsinissaq, sullivimmi atukkat, sumiiffimmiititsiniaaneq, atuarfiup soqutiginnittai, meeqqerivitsialaliorniarneq – tassunga atatillugu atuarfimmut piareersimaneq, immikkut annertusisamik atuartitsisarneq, inaarutaasumik misilitsittarneq, nunanit allaniit atuarfiullu avataanit ilinniartitsisus-sarsiortarneq, allamiut oqaasiinik ilinniartitsisinnaasunik ilinniartitsisussaaleqineq.

Tamakkuupput ulluinnarni atuarfiup silarsuaani ajornartoriutaasut, taamaattumillu suleqati-giiffiujarnissaat pisariaqartuulluni, suliaq ataqatigiissumik ingerlanneqassappat.

Naalakkersuisortaarput marsip aallartimaleranerani ataatsimeeqatigaarput, tassanilu atuar-fiup ulluinnarni ajornartorsiutigisartagai eqqartorpavut. Ataatsimiinnermi tassani isumaqa-tigiissutitsinnut ilaavoq ilinniartitsisussaaleqineq pillugu suleqatigiissitaliamut ilanngu-tissasugut, taakkumi maaji qaammat Inatsisartunut inassuteqaataasunik saqqummiussisus-saammata. Aammattaaq isumaqatigiissutigaaarput aturfik pillugu Naleqqiiffimmi ataatsimeersuartitsereerutta apriili qaammat naapeqatigeqqissalluta. Ataatsimiinnermi tassani aamma isumaqatigiissutitsinnut ilaavoq Inerisaavimmud suleqateqarnitsinni malitassaqarnerulluta suleqatigiilernissamut aaqqiisoqassasoq, illuatiungeriit tamarmik iluaqutigisussaammassuk.

FTF

Piffissap qaangiuttup ingerlanerani FTF-p ilisimasaminik tuniorarlunikuuaatigut. Suliasat assigiinnitsut ingerlanneranni immikkut ilisimasaqartortaat atorluartarsimavavut, soorlu pikkorissaanernut assigiinngitsunillu isumaqatiginninniuteqarnitsinnut tunngatillugu, taakku piareersarneranni ingerlannerqannilu. Taakku sulisorisaat atorlugit kisitseriaatsit naliler-sugassallu allat nalilersortissinnaasarsimavavut, minnerunngitsumik sulinermi avatangiisit pillugit inatsisip qanoq paasineqarnissaanut paasiniaatitsilluarsimalluta, minnerunngitsumik qasuersaarnernut ullormullu sulinngiffeqarnissamut tunngatillugu.

FTF aamma neqerooruteqarnikuuvut nunatsinni isumaqatigiinniarnernit assigiinngitsut inger-lanneqarnerannut nunatsinni kattuffinnik nalilersuisitseqataanissamut. Piffissap qaangiuttup

ingerlanerani paasissutissiisarsimanerannut ikiuuttarsimanerannullu matumuuna qujassute-qarfigerusuppavut.

ALLAT

Ilinniartitsisoq

Piffissami qaangiuttumi Ilinniartitsisoq nutaamik aaqqissuisortaarsimavoq. Aaqqissuisorput Danmarkimut nuunnikummat nutaamik aaqqissuisussarsiorsimavugut. Aaqqissuisortaap saqqummersitassaa siulleq tassaassaaq Ilinniartitsisoq aprilimi saqqummertussaq.

Ajornartorsiut uteqattaartuartoq tassaavoq ilaasortatsinnit tusaatitsinnut Ilinniartitsisoq-mut allagaqartoqarneq ajornera. Piffissaq manna iluatsillugu kaammattuutigeqqissuarput, ilaasortavut atuartartuvullu tusaatitsinnut ilanngussisaqqullugit.

Nittartagarput

Nittartagarput nutarternikuarput. Nutaarsiassat nammineq ikkussinnaalernikuuavut. Tamanna soorunami uatsinnut oqiliallaataavoq, suliaq nammineq ingerlassinnaanngoratsigu.

Tjenestemændenes Låneforening kiisalu Danmarks Lærerforenings Låneforening

Atorniartarfiit taakku marluk ilaasortatsinnik atorneqarluartuupput. Piffissami qaangiuttumi atukkiisinnaanerminnut periarfissanik annertusinikuupput tassa atuartitsisut aamma taak-kununga atorniarsinnaalernikummata.

Nassuiaatit:

Siulersuisut ataatsimiineri:

24.-29.05.06	Siulersuisut Nuummi ataatsimiinnerat
22.-23.06.06	Siulersuisut Nyborgimi ataatsimiinnerat
20.-22.08.06	Siulersuisut Nuummi ataatsimiinnerat
25.09.06	Siulersuisut oqarasuaatitigut ataatsimiinnerat
19.-21.10.06	Siulersuisut Nuummi ataatsimiinnerat
15.-20.11.06	Siulersuisut Nuummi isumaqatigininniarnat
18.12.06	Siulersuisut oqarasuaatitigut ataatsimiinnerat
12.-15.12.06	Siulersuisut Ålborgimi ataatsimiinnerat
12.02.07	Siulersuisut oqarasuaatitigut ataatsimiinnerat
04-08.03.07	Siulersuisut Nuummi ataatsimiinnerat

Ataatsimiinnerit allat:

30.05.-11.06.06	Siulersuisut Lisbeth Frederiksen peqatigalugu isumaqatigininniarnat
01.06.06	Siulersuisut Mikkili Schourupimik ataatsimeeqateqarnera
09.06.06	Sivso Dorship katuffinnik allanik ataatsimeeqateqarnera SIK ilanngullugu
14.06.06	Sivso Dorship Lisbeth Frederiksenillu Nuup Kommuneanik, KIIP-mik Inerisaavimmik KANULOKA-millu ataatsimeeqateqarnera
16.06.06	Sivso Dorship Lisbeth Frederiksenillukattuffinnik allanik ataatsimeeqateqarnera SIK ilanngullugu
16.06.06	Sivso Dorship ilinniartitsisunngorniat ilinniartitsisunngornerani peqataanera
16.06.06	Lisbeth Frederiksen nittartagaq pillugu ataatsimiippoq
19.06.06	Sivso Dorship Lisbeth Frederiksenilu Feriefondip siulersuisuinik ataatsimeeqaterqarnerat.
20.06.06	Sivso Dorship Timelærerit feriefondianni ataatsimeeqateqarnera
27.06.06	Lisbeth Frederiksenip ataatsimeeqatigai Birgitte Hjerrild FTF kiisalu Jon Kowalzyk LC
28.06.06	Lisbeth Frederikseip ataatsimeeqatigaa Birgit Thaae DLF
28.06.06	Lisbeth Frederiksenip ataatsimeeqatigaa Laila Jensen kiisalu DLF
28.06.02.07.06	PAR, ERO kiisalu JRE NLS-ip aasaanerani pikkorissartitsinerani Savalimmiuni peqataapput
10.-15.07.06	ERO ICC-p Alaskami ataatsimiitsinerani peqataavoq
04.08.06	Sivso Dorship Mikkili Schourop ataatsimeeqatigaa
09.08.06	Sivso Dorship Nikku Ezekiasen, Sanasoq ataatsimeeqatigaa
09.08.06	Lisbeth Frederiksenip Hans Hansen kiisalu Anette Bendixen FTF ataatsimeeqatigai
10.08.06	Sivso Dorship kattuffiit allat ataatsimeeqatigai
10.08.06	Lisbeth Frederiksenip Birgitte Thaae ilaasortaanermullu allattoqarfik ataatsimeeqatigai
10.08.06	Lisbeth Frederiksenip inatsisileritooq Tine Rud ataatsimeeqatigaa
11.08.06	Lisbeth Frederikseni Østre Landsretimi, Kbh.
14.08.06	Sivso Dorship Lisbeth Frederiksenillu marianne Jensen, Eskimomanagementimeersoq ataatsimeeqatigaa
15.08.06	Sivso Dorship Piginnaangorsaanermut ataatsimiitsitaliami ataatsimiippoq
16.08.06	Sivso Dorship Søren Rasmussen, KANUKOKA ataatsimeeqatigaa
17.08.06	Sivso Dorship Lisbeth Frederiksenillu Nuummi TR-it ataatsimeeqatigaa

18.08.06 Sivso Dorship Sanasoq INUPLAN-ilu ataatsimeeqatigai
18.08.06 Sivso Dorship Jens Jakobsen, Inerisaavik ataatsimeeqatigaa
21.08.06 siulersuisut Jens Jakobsen, Inerisaavik ataatsimeeqatigaat
23.08.06 Sivso Dorship Lisbeth Frederiksenillu kattuffiit allat ataatsimeeqatigaat
24.08.06 Lisbeth Frederiksenip PIP PPK-lu AMR pillugu ataatsimiinnginnermi
piareersaataasumik ataatsimeeqatigai
28.08.06 Sivso Dorship Søren Rasmussen, KANUKOKA ataatsimeeqatigaa
29.08.06 Sivso Dorship Lisbeth Frederiksenillu IT-Partner ataatsimeeqatigaa
30.08.06 Sivso Dorship Karno Lyngø, USK ataatsimeeqatigaa
30.08.06 Lisbeth Frederiksen AMR-mik ataatsimeeqateqarnera
30.08.06 Sivso Dorship Franz Tremelimiik ataatsimeeqateqarnera
01.09.06 Lisbeth Frederiksenip Kattie Egede, Inerisaavik ataatsimeeqateqarnera
01.09.06 Lisbeth Frederiksenip NIF-p atoqqaarfissiorneranik peqataanera
05.09.06 Lisbeth Frederiksenip DLF-p pikkorissaanermi immikkoortortaarfianik
oqarasuaatikkut ataatsimeeqateqarnera
05.09.06 Lisbeth Frederiksenip FTF-p pikkorissaanermi immikkoortortaarfianik
oqarasuaatikkut ataatsimeeqateqarnera
07.09.06 Sivso Dorship Lisbeth Frederiksenillu NIF-mik ataatsimeeqateqarnera
11.09.06 Sivso Dorship Lisbeth Frederiksenillu Mikki Schourupimik
ataatsimeeqateqarnera
13.09.06 Sivso Dorship Doris Jakobsen, naalakkersuisunut ilaasortaq ataatsimeeqatigaa
13.09.06 Sivso Dorship Andreas Olsen, KIIP ataatsimeeqateqarnera
13.09.06 Sivso Dorship Louise Richter, KIIP ataatsimeeqateqarnera
13.09.06 Sivso Dorship Lisbeth Frederiksenillu Tina Pars ataatsimeeqateqarnerat
15.09.06 Lisbeth Frederiksenip Mikki Schourup ataatsimeeqatigaa
15.-21.09.06 Sivso Dorship Johan Reimerilu "Siunissamik aqutsineq" DK-mi pikkorissarfigaat
22.09.06 Sivso Dorship Lisbeth Frederiksenillu Mikki Schourup ataatsimeeqatigaat
22.09.06 Sivso Dorship Lisbeth Frederiksenillu Tina Pars ataatsimeeqatigaat
26.09.06 Sivso Dorship najugaq qimannagu ilinniartitsisunngorniat ataatsimeeqatigai
27.09.06 Sivso Dorship Karno Lyngø, USK ataatsimeeqatigaa
27.09.06 Sivso Dorship PPK PIP-lu KUR pillugu ataatsimeeqatigai
27.09.06 SDO, LIF JEB-llu Per Skaarup, GrønlandsBanken ataatsimeeqatigaat
27.09.06 Sivso Dorship KANUKOKA-p siulittaasua Lars Karl Jensen direktør Martha
Labansenilu ataatsimeeqatigai
03.10.06 Sivso Dorship Lisbeth Frederiksenilu Adventure North ataatsimeeqatigaat
03.10.06 Sivso Dorship Air Greenland Travel ataatsimeeqatigaa
03.10.06 Sivso Dorship Jens Jakobseb ataatsimeeqatigaa
03.10.06 Sivso Dorship Martha Labansen ataatsimeeqatigaa
04.10.06 Sivso Dorship Lisbeth Frederiksenillu PPK ataatsimeeqatigaat
04.10.06 Sivso Dorship Lisbeth Frederiksenillu sumaqatiginninniartarfik
ataatsimeeqatigaat
05.10.06 Lisbeth Frederiksen KATUAQ-mi EU-p pilersaarutaanik paasissutissiinermi
peqataavoq
05.10.06 Sivso Dorship Paul Raahaugellu Anders Bondo Christensen ataatsimeeqatigaat
06.10.06 Lisbeth Frederiksen Inerisaavimmiippoq atuarfinni aqutsisut
ataatsimeersuarnerat peqataaffigalugu
06.10.06 Sivso Dorship Paul Raahaugellu Lederforeningen DLF ataatsimeeqatigaat
06.10.06 Sivso Dorship Paul Raahaugellu FTF ataatsimeeqatigaat

09.-10.10.06 Sivso Dorship Paul Raahaugillu DLF.mi ataatsimeersuarneq peqataaffigaat
11.10.06 Lisbeth Frederiksen Inerisaavimmi CREDE pillugu
13.10.06 Sivso Dorship Jens Jakobsen, Inerisaavik ataatsimeeqatigaa
16.10.06 Sivso Dorship Lisbeth Frederiksenilu Feriefondip siulersuisuani ataatsimiipput
17.10.06 Sivso Dorship "Naleqqiiffik" pillugu tusagassiutinut nalunaaruteqarpoq
23.-31.10.06 Siulersuisut Isumaqatiginninniartarfimmi isumaqatiginninniartup
01.-06.11.06 Lisbeth Frederiksen pikkorissaqataavoq Nunaqarfiit atuarfiisa aqutsisuiunut sulisoqarnermi inatsisit pillugit
13.-15.11.06 Sivso Dorship Ilinniartitaaneq pillugu ataatsimeersuarnermi peqataavoq
16.-19.11.06 Siulersuisut Isumaqatiginninniartarfimmi isumaqatiginninniartup
20.11.06 Paul Raahauge Narsami ilaasortanut ataatsimiititsivoq
21.11.06 Paul Raahauge Qaqortumi ilaasortanut ataatsimiititsivoq
21.11.06 Sivso Dorship Esther rosingilu Nuummi ilaasortanik ataatsimiititsipput
21.11.06 Lisbeth Frederiksen pikkorissaqataavoq kommunet atuarfimmittut aqutsisoqarfiisa pisortaannut sulisoqarnermi inatsisit pillugit
24.-30.11.06 Sivso Dorship NLS-p Islandimi ataatsimiinnerani peqataavoq
29.11.06 Sivso Dorship Laila Jensen ataatsimeeqatigaa
29.11.06 Sivso Dorship Ole harrir oqarasuaatikkut ataatsimeeqatigaa
04.12.06 Sivso Dorship Søren Rasmussen, KANUKOKA ataatsimeeqatigaa
05.12.06 Sivso Dorship Maniitsup Atuarfiani pisortaq ataatsimeeqatigaa
05.12.06 Sivso Dorship Kuuttartup atuarfiani pisortaq ataatsimeeqatigaa
05.12.06 Sivso Dorship Maniitsumi ilaasortanut ataatsimiisitsivoq
05.12.06 Sivso Dorship Maniitsumi TR-nut ataatsimiisitsivoq
05.12.06 Johan Reimer Niaqaornaarsummi ilaasortanut ataatsimiititsivoq
05.12.06 Johan Reimer kangaatsiami ilaasortanut ataatsimiititsivoq
06.12.06 Lisbeth Frederiksenip Paamiuni atuarfiup pisortaa ataatsimeeqatigaa
06.12.06 Lisbeth Frederiksenip Paamiuni TR-nut ataatsimiititsivoq
06.12.06 Lisbeth Frederiksenip Paamiuni ilaasortanut ataatsimiititsivoq
06.12.06 Sivso Dorship Sisimiuni ilaasortanut ataatsimiititsivoq
06.12.06 Sivso Dorship Sisimiuni TR-nut ataatsimiititsivoq
07.12.06 Lisbeth Frederiksenip Paamiut kommuneata atuarfimmittut aqutsisoqarfiani pisortaq TR-llu ataatsimeeqatigai
07.12.06 Lisbeth Frederiksen paamiuni ilaasortanut ataatsimiititsivoq
07.12.06 Sivso Dorship immikkut atuartitsinermi atuarfik ataatsimeeqatigaa
07.12.06 Sivso Dorship Ilulissat Kommuneata atuarfimmittut aqutsisoqarfiani pisortaq ataatsimeeqatigaa
07.12.06 Sivso Dorship Ilulissani ilaasortanut ataatsimiititsivoq
07.12.06 Sivso Dorship Ilulissani TR-nut ataatsimiititsivoq
11.12.06 Lisbeth Frederiksen Inerisaavimmi ilaasortanut ataatsimiititsivoq
12.12.06 Lisbeth Frederiksen Nuup Kommuneani allaffeqarfinni ilaasortanut ataatsimiititsivoq
12.12.06 Sivso Dorship Kattie Egede Motzfeldt ataatsimeeqatigaa
14.12.06 Sivso Dorship Lisbeth Frederiksenillu kattuffiit allat ataatsimeeqatigaa
14.12.06 Sivso Dorship Jens Jakobsen, Inerisaavik ataatsimeeqatigaa
18.12.06 Sivso Dorship Lisbeth Frederiksenillu Adventure North ataatsimeeqatigaa
18.12.06 Sivso Dorship Lisbeth Frederiksenillu NIF tsimeeqatigaa
19.12.06 Sivso Dorship Timelærerit Feriefondiani ataatsimiipput
08.01.07 Sivso Dorship Lisbeth Frederiksenillu Robert Sørensen ataatsimeeqatigaa

12.01.07 SDO, LIF, JRE kiisalu PAR Hannna Mølgaard ataatsimeeqatigaat
12.01.07 SDO, LIF, JRE kiisalu PAR atuarfiup aqutsisua Gorm Sæderup
ataatsimeeqatigaat
16.01.07 Lisbeth Frederiksenip Hanna Mølgaard Ole Harritilu ataatsimeeqatigai
17.01.07 Lisbeth Frederiksenip Ålborg Kommuneata sulisoqarnermut immikkoortoqarfia
ataatsimeeqatigaa
23.01.07 Sivso Dorship Jens Jakobsen, Inerisaavik ataatsimeeqatigaa
26.01.07 Sivso Dorship Inerisaaviup aqutsisui ataatsimeeqatigai
24.01.07 Sivso Dorship Lisbeth Frederiksenillu Nuussuup Atuarfia ataatsimeeqatigaat
26.01.07 Lisbeth Frederiksenip Nuussuup Atuarfia ataatsimeeqatigaa
26.01.07 Lisbeth Frederiksenip PIP AMR-I pillugu oqarasuaatikku ataatsimeeqatigai
26.-29.01.07 Sivso Dorship Ilinniarfissuarmi 3. S-niippoq
29.01.07 Sivso Dorship PIP KUR-i pillugu ataatsimeeqatigai
29.01.07 Lisbeth Frederiksenip PPK AMR-I pillugu ataatsimeeqatigai
30.01.07 Sivso Dorship Lisbeth Frederiksenillu Mikkili Skourup ataatsimeeqatigaat
31.01.07 Lisbeth Frederiksen ataatsimiippoq APV AT DK pillugu
31.01.07 Lisbeth Frederiksenip Tine Rud ataatsimeeqatigaa
01.02.07 Lisbeth frederiksen AMR-mi ataatsimiippoq
31.01.-02.02.07 Sivso Dorship KUR-imi Sisimiuni ataatsimiippoq
02.02.07 Sivso Dorship Simon Lennert Nalunnguarfiup Atuarfia Sisimiut,
ataatsimeeqatigaa
02.02.07 Lisbeth Frederiksenip Mikkili Schourup ataatsimeeqatigaa
05.02.07 Sivso Dorship Lisbeth Frederiksenillu Isumaqaginninniartarfik
ataatsimeeqatigaat
06.02.07 Lisbeth Frederiksen Nuussuup Atuarfiani ataatsimiippoq
07.02.07 Sivso Dorship Lisbeth Frederiksenillu Mikkili Schourup ataatsimeeqatigaat
08.02.07 Sivso Dorship Nuup Kommuneani KANUKOKA-milu isumaqatiginninniartarpoq
09.02.07 Lisbeth Frederiksenip Lars Drejeri, Isumaqatiginninniartarfik ataatsimeeqatigaa
09.02.07 Sivso Dorship Lisbeth Frederiksenillu Mikkili Skourup ataatsimeeqatigaat
13.02.07 Sivso Dorship, Lisbeth Frederiksen Tine Rud-illu Ittoqqortoormiuni borgmesteri,
kommunaldirektøri kiisalu KANUKOKA-meersut Søren Rasmussen Jakob
Henrichsenilu ataatsimeeqatigaat
15.02.07 Sivso Dorship Lisbeth Frederiksenillu Isumaqatiginninniartarfik
ataatsimeeqatigaat
15.02.07 Lisbeth Frederiksenip Sullivinnik Nakkutilliisoqarfik ataatsimeeqatigaa
16.02.07 Sivso Dorship Lisbeth Frederiksenillu Isumaqatiginninniartarfik
ataatsimeeqatigaat
16.02.07 Sivso Dorship Lisbeth Frederiksenillu Mikkili Skourup ataatsimeeqatigaat
19.02.07 SDO, ERO, LIF Jens Jakobsen Søren Posbøllilu, Inerisaavik ataatsimeeqatigaat
19.02.07 Sivso Dorship Lisbeth Frederiksenilu Ferierejsefondimi ataatsimiipput
21.02.07 SDO, REO LIF Ida Heinrich ataatsimeeqatigaat
23.02.07 Sivso Dorship Sanasoq INUPLAN-ilu ataatsimeeqatigai
23.02.07 Sivso Dorship Esther Rosingillu Isumaqatiginninniartarfik ataatsimeeqatigaat
26.02.07 Sivso Dorship Esther Rosingillu Inerisaavikmeersut Jens Jakobsen, Søren
Porsbøllilu Issiki Therkelsen ataatsimeeqatigaat
02.03.07 Sivso Dorship Mikkili Svhourup ataatsimeeqatigaa
05.03.07 Siulersuisut Inerisaavik ataatsimeeqatigaat
07.03.07 Liulersuisut Mikkili Shourup ataatsimeeqatigaat

08.03.07 SDO, MLY, LIF, Nuna Advokaternellu KANUKOKA ataatsimeeqatigaat
08.03.07 SDO, ERO kiisalu JRE naalakkersuisunut ilaasortaq Tommy Marø
ataatsimeeqatigaat